

ԲԱՆԱՎԵՃԵՐ ԵՎ ՔՆՆԱՐԿՈՒՄՆԵՐ ДИСКУССИИ И ОБСУЖДЕНИЯ

ՄՈՎՍԵՍ ԽՈՐԵՆԱՑՈՒ
ԺԱՄԱՆԱԿԱԳՐՈՒԹՅԱՆ ՄԻ ՔԱՆԻ ՀԱՐՑԵՐԻ ՄԱՍԻՆ

Լ. Փ. ՇԱՀԻՆՅԱՆ

«Սխալ ճանապարհի վրա է Լ. Շահինյանը»¹ Այսպես է ավարտվում պատմական գիտությունների դոկտոր Գ. Խ. Սարգսյանի հոդվածը¹, որն ուղղված է հորինացու ժամանակագրության վերականգնման առթիվ մեր բերած հիմնական առաջարկների դեմ:

Առաջին առաջարկով², որին ծանոթ է ընթերցողը, անհավանական ենք համարել ճանաչված հայտդետ Սեն-Մարտենի, ինչպես նաև նրա հետևորդների տեսակետը՝ Արշակունիների թագավորության սկիզբը ըստ հորինացու որոշելու հարցում, և ասյա համապատասխան փաստերի հիման վրա եղրակացրել ենք. ա) հորինացու «Հայոց պատմության» երկրորդ և երրորդ գրքերի ժամանակագրության ելակետը Ալեքսանդր Մակեդոնացու մահվան տարեթիվն է՝ 323 թ. (մ. թ. ա.) կամ, մասնակի վերապահությամբ, հաջորդ տարին. բ) Խոռենացին Սելևկյանների թագավորությունը հաշվել է ոչ թե սելևկյան էրայի սկզբնատարից՝ 312 (311 թ.) մ. թ. ա., այլ Ալեքսանդր Մակեդոնացու մահվան տարեթվից՝ կամ, գուցե, հաջորդ տարվանից. գ) Պարթևների թագավորության սկզբնատարին, ըստ Խոռենացու, 263 կամ 262 թվականն է (մ. թ. ա.), փոխարեն ընդունելի համարված 252, 251 կամ 250-ի (մ. թ. ա.)³:

Գ. Սարգսյանը, մի տեսակ անբավական մեր գործից, քանի որ հանդգնել ենք անհավանական համարել Սեն-Մարտենի, ինչպես ինքն էլ է ասում, հայագիտության մեջ ընդունելի դարձած տեսակետը (էջ 135), հանգամանորեն բացատրում է այդ տեսակետի էությունը, դրա հավանականության օգտին փաստեր է վկայակոչում (էջ 135—138) և հարց ու պատասխանի ձևով եզրակացնում է. «Իսկ ի՞նչ է հակադրել Շահինյանը այս բոլորին: Ոչինչ: Նա պարզապես լռության է մատնել սելևկյան էրայի սկզբնատարին Ալեքսանդր Մակեդոնացու անվամբ կոչվելու երևույթն իսկ, հույսը դնելով ընթերցողի անտեղ-

¹ Գ. Խ. Սարգսյան, հորինացու «Պատմության» ժամանակագրական համակարգի վերականգնման մասին (տե՛ս «Պատմա-բանասիրական հանդես», 1968, № 1, էջ 119—146): Այսուհետև Գ. Սարգսյանի հոդվածի համապատասխան էջերը նշելու ենք տողամիջում, տողատակերը շծանրաբեռնելու նպատակով:

² Գ. Սարգսյանի մոտ մեր առաջարկները ետուառաջ են ներկայացված: Առաջին հարցը կամ առաջին առաջարկը նրա հոդվածում դարձել է երրորդ, իսկ երրորդը՝ առաջին, որովհետև այդպես նպատակահարմար է թվացել: Սույն մոտեցումը թիրևս հնարավոր լինելու անուշադրության տալ, եթե մեր քննարկած հարցերի հաջորդականությունը պայմանավորված չլինելու հորինացու ժամանակագրական տեղեկությունների անխախտելի հաջորդականությամբ: Այնպես որ դա սոսկ ձևական բնույթ չի կրում՝ ենթակա ուսումնասիրողի քմայքին, այլ հորինացու երկից բխող պարտադիր պահանջ է:

³ Տե՛ս «Պատմա-բանասիրական հանդես», 1966, № 1, էջ 155—172:

յակության վրա՝ ամբողջությամբ շրջանցել է իր տեսակետը եղծանող այս հանգամանքը և իր ջանքերն ուղղել դեպի մանր-մունր խոշորոգոտների հաղթահարումը» (էջ 138)։

Այստեղ իսկ նշենք, որ «մանր-մունր խոշորոգոտներ» ասելով Գ. Սարգսյանը նկատի է ունեցել Մ. էմինի և Ք. Պատկանյանի փաստարկումները⁴, որոնք մինչև վերջերս բոլորովին էլ «մանր-մունր» չէին։ Սակայն սա չէ կարևորը։ Ներկա պահին կարևորն այն է, որ մսւնը թե մսւնը, խորհնացու համապատասխան տեղեկությունները սելեկյան էրայով բացատրելու հրկու փորձ կարող ենք հաղթահարված համարել։ Այնուհետև, անդրադառնալով Սեն-Մարտենի կարծիքին, Գ. Սարգսյանը գրում է. «Շահինյանը չի հերքել իր կողմից վիճարկվող տեսակետի հիմնական փաստարկը, այլ շրջանցել է այն, ցուցաբերելով գիտական անբարեխղճություն» (էջ 139)։

Սույն մեղադրանքը պայմանավորված է այն բանով, որ մենք Գ. Սարգսյանի ցանկացած ձևով չենք ներկայացրել Սեն-Մարտենի տեսակետը և, ինչպես ասում է, չենք հերքել մեր տեսակետը «եղծանող» բուն հանգամանքը, որի հետ նա այդքան մեծ սպասելիքներ է կապել։ Ահա թե ինչու, հետագա մեղադրանքներից ու հնարավոր վեճերից խուսափելու նպատակով, որոշեցինք Սեն-Մարտենին ներկայացնել այնպես, ինչպես Սարգսյանի մոտ է։

«Խորենացին,— ասել է նա (Սեն-Մարտենը),— «առեկցիների մեծամասնությանն նման սկսել է սելեկյան էրան Ալեքսանդրի մահվան ենթադրյալ ժամկետից»։ Այս միտքը,— բացատրում է Գ. Սարգսյանը,— նա պարզաբանել է հետևյալ խոսքերով. «Հաստատ է, որ մինչև մեր օրերը ասորիները տալիս են Ալեքսանդրի անունը այն էրային, որի սկիզբն է Քրիստոսից առաջ 311 թվականի հոկտեմբեր ամիսը»⁵ (էջ 136)։

Ի հավելումն Սեն-Մարտենի այս մտքերի, որոնց ընդգծումն անհրաժեշտ համարեցինք, Գ. Սարգսյանը անմիջապես շարունակում է. «Բացենք ժամանակագրության խնդիրներին նվիրված ցանկացած ձեռնարկը և ամենուրեք սելեկյան էրային նվիրված բաժնում տեղեկություն կգտնենք այն մասին, որ սելեկյան էրան տարբեր անվանումներ է ունեցել, օրինակ, «հունաց թվական», և որ, հիրավի, հենց խորհնացու ժամանակաշրջանում, նրանից առաջ և նրանից հետո էլ Արևելքում՝ ասորիների, պարսիկների, արաբների ու այլ ժողովուրդների մոտ այդ էրայի ամենատարածված անվանումներից մեկը կապված է հղել Ալեքսանդր Մակեդոնացու (Իսքանդարի, Երկեղջուրի) անվան հետ։ Եվ այդ՝ հակառակ այն իրողության, որ Ալեքսանդրը մահացել է 312/311 թ. 12 տարի առաջ» (էջ 136)։

Կարգում ես Սեն-Մարտենի արդեն պարզաբանված մտքերը նորից պարզաբանող վերոհիշյալ տողերը, ծանոթանում ես դրանց հիմնավորմանը ծառայող փաստերին և ակամա հարցնում՝ ինչի՞ համար է այդ բոլորը։ Ո՞վ է վիճարկել, թե սելեկյան էրան այլ անվանումներ չի ունեցել կամ Ալեքսանդրի անունով չի կոչվել։

⁴ Տե՛ս նույն տեղում, էջ 157—159։

⁵ Մ. թ. ա. 311 թ. հոկտեմբեր ամիսը՝ իբրև սելեկյան էրայի սկզբնական, այստեղ, թերևս, վրիպակ է, քանի որ ինքը՝ Սարգսյանը, մեկ այլ առիթով ճիշտ նկատել է, որ սելեկյան տոմարի ելակետն է մ. թ. ա. 312 թ. դիոս (հոկտեմբեր) ամիսը...» (տե՛ս Գ. Սարգսյան, Մովսես Խորենացու «Հայոց պատմության» ժամանակագրական համակարգը, Երևան, 1965, էջ 15, ծանոթ. 8)։

Սակայն ի՞նչ կապ կա այս բոլորի և Խորենացու մեղ ծանոթ տեղեկությունների միջև։ Եվ ինչո՞ւ միայն Խորենացու ի՞նչ կապ կա դրանց և Անանունի կամ Խորենացու միջնադարյան հետևորդների տեղեկությունների միջև։ Մեր համոզումով՝ որևէ կապ չկա և լինել չի էլ կարող։ Դրանց միջև կապ է ստեղծվում այն բանից հետո, երբ անառարկելի ենք համարում Սեն-Մարտենի ենթադրությունը, թե՛ «Խորենացին արևելցիների մեծամասնության նման սկսել է սելեկյան էրան Ալեքսանդրի մահվան ենթադրյալ ժամկետից»։ և ընթանում ենք այդ ենթադրության հետքերով։

Իրականում Սեն-Մարտենի այս ենթադրությունը առարկելի է ամենատարբեր առումներով։

Առաջին, Խորենացու մոտ ոչ միայն որևէ տեղեկություն, այլ անգամ հետազոտողի ակնարկ չկա սելեկյան էրայի մասին։ Ծիշտ է, պարսից Արշակունիների թագավորության սկզբնատարին ցույց տալու համար Խորենացին հաշվումներ է կատարել նաև սելեկյան արքաների գահատարիներով, սակայն սա չի նշանակում, թե նա սելեկյան էրան է նկատի ունեցել։ Ինչպես նշել ենք մեր հոդվածում, հենց դրա հակառակն է Խորենացու մոտ։ Սելեկյանների թագավորությունը նա հաշվել է ոչ թե սելեկյան էրայի սկզբնատարուց (312 կամ 311 թ. մ. թ. ա.), այլ Ալեքսանդր Մակեդոնացու մահվան տարեթվից (323 թ. մ. թ. ա.), ուստի և նրա խոսքը սելեկյան էրայի մասին չէ։ Այս բանի պերճախոս ապացույցն է, ինչպես քանիցս վկայակոչվել է, Խորենացու «որպէս ասացաք» ցուցումը և դրան հաջորդող բացատրությունը, թե «յետ վարսուն ամի մահուանն Ալեքսանդրի՝ քաղաութ է ի վերայ պարեաց Արշակ Քաջ...»։

Այսուհանդերձ, Բ. Սարգսյանը, հանդես գալով Սեն-Մարտենի տեսակետի պաշտպանության դիրքերից, մի այսպիսի միտք է շարադրել. «Ասածս ամենեին չի նշանակում,— գրում է նա,— թե հնարավոր չէր կամ Խորենացին չէր կարող հաշվել ժամանակը Ալեքսանդրի մահվան բուն տարեթվից, այլ միայն այն, որ նա այդպես չի հաշվել իրականում» (էջ 138)։

Մենք չգիտենք, Խորենացու տեղեկություններին ծանոթ ո՞ր ընթերցողի կհամոզի Գ. Սարգսյանի սույն հայտարարությունը, ո՞վ կհավատա, քե խորենացին իր ժամանակագրական հաշիվը չի սկսել Ալեքսանդրի մահվան բուն տարեթվից, երբ նրա մոտ չափազանց հստակ սեռվ սպիտակի վրա գրած է. «յետ վարսուն ամի մահուանն Ալեքսանդրի՝ քաղաութ է ի վերայ պարեաց Արշակ Քաջ...»։

Ի դեպ, Գ. Սարգսյանը տվյալ դեպքում նոր բան չի ասել։ Նա պարզապես փորձել է հովանավորվել Սեն-Մարտենի՝ դեռևս ապացույցների կարոտ այն կարծիքով, որ, իբր թե, Խորենացին՝ Ալեքսանդրի (Մակեդոնացու) մահը նշելով, նրա մահվան ենթադրյալ ժամանակն է նկատի ունեցել։ Ավելի պարզ ասած, ինչպես երևում է Սեն-Մարտենի ու իր տեսակետն ընդունողների (Շ. Տաշյանի, Գ. Սարգսյանի և այլոց) համապատասխան բացատրություններից, Խորենացին՝ Ալեքսանդր Մակեդոնացու մահը նշելով, ալեքսանդրյան թվականություն է նկատի ունեցել, որի սկիզբը դրվում է նրա մահվան բուն թվականից 12 տարի հետո։ Ահա սա էլ Սեն-Մարտենի քննարկվող ենթադրության երկրորդ խիստ առարկելի հանգամանքն է, որը ոչ այլ ինչ, քան Խորենացու վկայությունների մոացածին մեկնաբանություններից։ Եվ, իրոք, Խորենացու ո՞ր տեղեկության հիման վրա Սեն-Մարտենը կամ իր տեսակետի պաշտպանները կարող են կարծիք հայտնել, թե նա Ալեքսանդրի մահվան ենթադրյալ ժամկետը կամ

ալեքսանդրյան թվականն է նկատի ունեցել: Մեր համոզումով՝ ոչ մի, ուսման համար հարկադրված միայնակի նշված է Ալեքսանդր Մակեդոնացու մահվան թվականը (բնական է, որ խոսքը մահվան բուն թվականի մասին է, քանզի մահվան ուրիշ թվական չի եղել չի կարող) և ոչ թե ալեքսանդրյան կոչված թվականը:

Այսպիսով, Սեն-Մարտենի տեսակետն իմաստավորող բուն ենթադրությունն էր, որ երկու բաղադրիչներն էլ հավասարապես անհամոզիչ են, քանի որ չեն բխում հորենացու տեղեկություններից:

Նման պարագաներում հարկ կա՞նք ասելու, որ ինչպես Սեն-Մարտենի խոսքը՝ սեղեկյան ու ալեքսանդրյան (կամ Ալեքսանդրի անունով կոչված) թվականների նույնությունն է, այնպես էլ նրա տեսակետը պաշտպանողների բերած փաստերն այս առթիվ (նկատի ունենք հատկապես Հ. Տաշյանին և Գ. Սարգսյանին) հորենացու ժամանակագրության համար դառնում են ավելորդ աշխատանք: Ավելորդ, որովհետև նախքան այդ բնույթի փաստերի վկայակոչումը պետք է հիմնավորապես ապացուցվի, որ իրոք հորենացին սեղեկյան էրան է նկատի ունեցել, որ նրա նշած «...յետ ...մահուանն Ալեքսանդրի...» միտքը Ալեքսանդրի մահվան ենթադրյալ ժամկետ կամ ալեքսանդրյան թվական է նշանակում:

Այս է փաստորեն Գ. Սարգսյանի ճանաչած Սեն-Մարտենի տեսակետի էությունը, որը նա հակադրել է մեզ և համարել է անառարկելի ճշմարտություն: Այս է, վերջապես, Գ. Սարգսյանի այն անխոցելի պատվարը, որի դեմ, նրա կարծիքով, մեր բերած փաստերը «ոչինչ» են և «ոչ մի քայլ չեն մոտեցրել մեր դրույթի հաստատմանը» (էջ 139):

Թե ի՞նչ փաստեր էինք բերել մեր դրույթի հաստատման համար, ընթերցողը ծանոթ է, և այստեղ երկրորդելու անհրաժեշտություն չկա: Բավական ենք համարում վերհիշել թեկուզ վկայակոչված հեղինակների անունները՝ Մովսես հորենացի, Անանուն, Հովհաննես Դրասխանակերտցի, Թովմա Արծրունի, Ասողիկ, Մխիթար Անեցի, Վարդան Բարձրաբերդցի և ուրիշներ:

Եթե մենք վերահիշյալ բոլոր հեղինակների տեղեկությունները հասկացել ենք իրենց ուղղակի նշանակությամբ, առանց դարտուղի մեկնաբանությունների, այսինքն այնպես, ինչպես շարադրված է նրանց մոտ, Գ. Սարգսյանը դրանք չունի այնպես ենթարկել է Սեն-Մարտենի մեզ արդեն ծանոթ ենթադրության «ամենազուրկ» ուժին: Նրա կարծիքով (ի դեպ, սա Հ. Տաշյանի կարծիքն է, որին ըստ ամենայնի հետևել է Գ. Սարգսյանը) հորենացին չէ միայն, որ Ալեքսանդրի մահը նշելով, նկատի է ունեցել ալեքսանդրյան թվականություն, այլ մնացած բոլորը՝ թե՛ Անանունը և թե՛ հորենացու միջնադարյան հետևորդները: Այս էլ այն պատճառով, որ Անանունից զատ մնացած բոլորը ընդօրինակել են հորենացուն: Իսկ Անանունը... Սա էլ, Սարգսյանի պնդումով (էջ 139), Սեն-Մարտենի, Հ. Տաշյանի և իր հասկացած հորենացու նման է վարվել... Եվ այսպես, «չեղորացնելով» մեր դրույթը հաստատող փաստերի արժեքն ու թվարկելով վկայակոչված հեղինակների անունները, Գ. Սարգսյանը հարցնում է. «Բայց չէ՞ որ եթե ուրիշ փոխարեն լինեի ուրիշն կամ ուրիշ հարյուր օրինակ, դարձյալ դրանից հորենացու հաղորդածի և թված հեղինակների ընդօրինակածի իմաստը, բովանդակությունը չէր փոխվի, իսկ մենք տեսանք, թե որն է դրա բուն իմաստն ու բովանդակությունը» (էջ 138):

Սարգսյանի սույն հատվածի առաջին միտքը՝ մինչև «իսկ» շաղկապը, ապակողմնորոշող նշանակություն ունի: Այնպես է ստացվում, թե մենք ասել

ենք, որ Խորենացուն ընդօրինակող հեղինակների տեղեկությունները փոխում են նրա հաղորդածի իմաստը: Եթե Գ. Սարգսյանը մի փոքր լուրջ ուշադրություն դարձներ և շցականար տպավորություն ստեղծել, անսլացման կնկատեր, որ մեր հոգւածում, մասնավորապես վերջին 12 էջերում (160—172), հենց դրա հակառակն ենք ասել՝ որ Խորենացուն ընդօրինակող հեղինակների մեծագույն մասը, բացի Մովսես Կաղանկատւացուց, Սամվել Անեցուց և Ներսես Պալիենցից, Սելեկյանների և Արշակունիների ժամանակագրության հարցերում հետևել են միմիայն Խորենացուն, որ այդ հարցերում փորձել են տարբերվել և իրոք տարբերվում են Եվսերիոս Կեսարացուց (հատկապես ականբախ է Ասողիկի օրինակը), որ, ի վերջո, եթե ութի փոխարեն ութսուն կա՞ ութ հարյուր օրինակ ունենայինք, Խորենացու հաղորդածի իմաստը, բովանդակությունը ոչ միայն չէր փոխվի, այլ ավելի քան կհաստատվեր:

Մի հարց ևս, որին այժմ չի կարելի ուշադրություն չդարձնել: Ընթերցողին հայտնելով, որ մենք Սեն-Մարտենին ձիշտ շենք ներկայացրել, Ի. Սարգսյանը այնուհետև շարունակում է. «Իսկ Հակոբ Տաշյանի տեսակետը, որ շարադրված է նրա աշխատության 10 մեծագիր կամ 33 փոքր էջերի վրա, նույնիսկ վերոհիշյալ ձևով էլ հանդես չի եկել Երեմյանի հոգւածներում: Մենք այնտեղից միայն իմանում ենք, որ Տաշյանը այս հարցում «խիստ քննադատության, անդամ՝ հեղնանքի» է ենթարկել Գարադաշյանին և հալաթյանին, և այդ կասկածություններ է միայն, որ տողատակում վկայակոչված է Տաշյանի աշխատությունը» (էջ 138):

Բրավոյացի է Սարգսյանը, Հ. Տաշյանի ուսումնասիրության մասին մեր հոգւածներում քիչ է ասված: Եվ քանի որ առիթ է ստեղծվել, փորձենք ընթերցողին ներկայացնել այդ ուսումնասիրության էությունը, որով և բացատրած կլինենք մեր վերաբերմունքը:

Այստեղ իսկ հայտնենք, որ, կամա թե ակամա, նորից անշուշտ ենք Սեն-Մարտենին, որովհետև Հ. Տաշյանը փորձել է պաշտպանել Սեն-Մարտենի տեսակետը (ուրեմն քննարկվող հարցի վերաբերյալ նոր տեսակետ չունի) և իր ամբողջ ուսումնասիրության ընթացքում առաջնորդվել է նրա՝ մեղ ծանոթ ենթադրությունով: Ավելին, Հ. Տաշյանը նույնպես, ինչպես Գ. Սարգսյանը, անվերապահորեն ընդունելով Սեն-Մարտենի ենթադրությունը, ավելի է ընդարձակել դրա ազդեցության ոլորտները: Այսպես, նրա ուսումնասիրությունից երևում է, որ Ալեքսանդր Մակեդոնացու անվան հետ կապված ժամանակագրական բոլոր տեղեկությունները՝ նշված կլինի Ալեքսանդրի մահը, նրա թագավորության սկիզբը, Դարեհ III-ի դեմ տարած հաղթանակի տարին, ալեքսանդրյան թվական կամ մի ալլ բան, միևնույն է, պետք է սկսել 312 կամ 311 թ. (մ. թ. ա.). որովհետև դրանք, ըստ Տաշյանի, հասկացվելու են, այսպես ասած, ալլարանորեն, այսինքն՝ ալեքսանդրյան թվականություն: Հարկ է նկատել նաև. որ սույն մոտեցումը յուրահատուկ չէ միայն Տաշյանին. դա համընդհանուր ճանաչում դրած տեսակետ է, սլատմագիտական իշխող մտայնություն, որին

6 Ի դեպ, Գ. Սարգսյանը, որն անվերապահորեն ընդունել է Սեն-Մարտենի և Հ. Տաշյանի տեսակետը, Խորենացու ժամանակագրությանը նվիրված իր ծավալուն ուսումնասիրության մեջ ոչ միայն լուրջան է մատնել հակառակ կարծիքները (Մ. Չամչյանի, Ն. Ջնտոյանի, Ա. Գարազյանի, Գր. հալաթյանցի), այլև անհրաժեշտ չի համարել խոստովանել, որ ինքը Սեն-Մարտենի և Հ. Տաշյանի տեսակետի հետևորդն է. ավելին, նա չի նշել անգամ վերջիններիս անուններն ու համապատասխան գործերը:

տուրք են տվել թե՛ Անն-Մարտենը (ի դեպ, Սեն-Մարտենը զգույշ է վարվել, երբ դրել է, թե խորհնացին «արևելցիների մեծամասնության նման սկսել է սելեկյան էրան Աղեքսանդրի մահվան ենթադրյալ ժամկետից», ուրեմն նկատի է ունեցել նաև փոխմասնություն, որն այդպես չի վարվել), թե՛ Հ. Տաշյանն ու Վ. Սարգսյանը (վերջիններս իրենց զործերում անտեսում են փոքրամասնության զոյությունն իսկ) և թե՛ ուրիշներ:

Ըստ Հ. Տաշյանի. «...երբ կհանդիպինք թվականի մը, որ Աղեքսանդրի հետ կապ մը ունենալ կցուցնե, որեւէ պետք չկա բառացի առնել խոսքը՝ կապելու զայն ոչ Աղեքսանդրի թաղավորության, ոչ տիեզերակալության, ոչ մահվան և ոչ ուրիշ թվականի մը հետ: Այլ բնորոշանալիս և սովորաբար Սելեկյանն է, որ Աղեքսանդրի կհամարվեր Ասորվոց քով»⁷:

Գ. Սարգսյանը գրում է. «...խորհնացին ու իր հետևորդները բնավ միայնակ չեն Աղեքսանդր Մակեդոնացու մահվան տարեթիվը Սելեկոս Ա-ի գահակալման տարեթիվի հետ նույնացնելու գործում, և որ այդ նույնացման փաստից արդեն, ուրեղ էլ ու ալն հանդիպի, ինքնին բխում է երկվական այդ տարեթիվի՝ հենց մ. թ. ա. 312/311 թ. տեղադրվելու անխուսափելիությունը» (էջ 137):

Ահա այս ելակետն է, որ ապակողմնորոշել է բազմաթիվ ուսումնասիրողների, այդ թվում Հ. Տաշյանին ու Գ. Սարգսյանին՝ առանձին դեպքերում դառնալով նրանց սայթաքումների պատճառ:

Համոզվելու համար, որ ամենևին էլ այդպես չէ, ինչպես պնդում են Հ. Տաշյանն ու Սարգսյանը, որ հիշյալ ելակետը չի կարող ունենալ և չունի նրանց նշած ազդեցության ուժը, բերենք թեկուզ մի երկու փաստ:

Այսպես, XII—XIII դարերի արաբ աշխարհագիր Յակուտ ալ-Համավին, որի տեղեկության ակունքը անկասկածելիորեն ասորական ոլորտն է, խոսելով Մուֆարդին քաղաքի հիմնադրման մասին, «Աշխարհագրական բառադրքում» գրում է. «Ասում են նաև, թե շինությունն սկսել է Քրիստոսից հետո 300 թվականին. իսկ Ալեքսանդրի թվագրության 623 թվականին»⁸ (ընդգծումը մերն է—Լ. Շ.):

Մի կողմ թողած Մուֆարդին քաղաքի հիմնադրման տարեթիվի առթիվ թույլ տրված անճշտությունը, Յակուտ ալ-Համավինի այս տեղեկությունը անհերքելի և ամեն կասկածից զերծ մի փաստ է, որով կարելի է համոզված ապել, թե Աղեքսանդրյան թվադրության ելակետը նաև 323 թ. է (մ. թ. ա.), սլարդապես Աղեքսանդր Մակեդոնացու մահվան տարին:

Դիմենք նաև Եվսեբիոս Կեսարացուն. խոսելով Անտիոքոս Եպիփանեսի կողմից Երուսաղեմի տաճարի կողոպուտի մասին, նա գրում է. «Որպես ձգեալ ի վախճանէն Աղեքսանդրի Մակեդոնացու մինչև ց Ա (առաջին) ամն Եպիփանու Անտիոքայ յամս ԾԾ (150)...»⁹:

Սրանից հետո մեկ այլ առիթով էլ հայտնում է. «Ինին այսուհետև Եպիփանէս Անտիոքայ մինչև ԵԺ (15)-երորդի ամն Տիրերեայ ամբ ՄԱ (201), եւ յԱղեքսանդրէ Մակեդոնացու մինչև ի նոյն ամն Տիրերեայ՝ ամբ 3ԾԲ (352)»¹⁰:

⁷ Հ. Տաշյան, Արշակունի դրամներ, «Հանդես ամսօրյա», 1905, հոկտեմբեր, էջ 299:

⁸ Տե՛ս «Արաբական աղբյուրները Հայաստանի և հարևան երկրների մասին», կազմեց Հ. Թ. Նալբանդյանը, Երևան, 1965, էջ 115—116:

⁹ Եվսեբիոս Կեսարացի, Ժամանակագրություն, մասն Ա, Վենետիկ, 1818, էջ 192:

¹⁰ Նույն տեղում, էջ 195:

Նախքան Եվսեբիոսի սույն հաշվումներին հետևելը, հարկ է նշել, որ ըստ նրա Ալեքսանդր Մակեդոնացու վախճանը (մահը) տեղի է ունեցել ՃԺԴ (114)-երորդ օլիմպիադի առաջին տարում, այն է 323 թ. (մ. թ. ա.), Անտիոքոս Եպիփանեսը թագավորել է ՃԾԱ (151)-երորդի երրորդ տարվանից՝ 173 թ. (մ. թ. ա.), իսկ Տիբերիոսը կայսր է դարձել ՃՂԸ (198)-երորդի երրորդից՝ 15 թ. (մ. թ.)¹¹։

Այսպիսով, Եվսեբիոս Կեսարացին նույնպես, որը քաջատեղյակ է սելևկյան տոմարին, վերոհիշյալ հաշվումները կատարելիս ելակետ է ունեցել Ալեքսանդր Մակեդոնացու մահվան թվականը (323 թ. մ. թ. ա.), որովհետև, իրոք, 150 տարի է, ըստ Եվսեբիոսի, Ալեքսանդրի մահվանից մինչև Անտիոքոս Եպիփանեսի թագավորությունը (173 թ. մ. թ. ա.) և 352 տարի է մինչև Տիբերիոսի կայսրության 15-րդ տարին (29 թ. մ. թ.)։ Ուրեմն, եթե Եվսեբիոս Կեսարացին մի դեպքում նշել է 150 տարի «ի վախճանին Ալեքսանդրի Մակեդոնացու...», որը իր ձեռով ամենեին չի տարբերվում Խորհրդային նշածից, իսկ մյուս դեպքում էլ՝ 352 տարի «Ալեքսանդրի Մակեդոնացու...», ուր նկատի է առնված դարձյալ նրա վախճանը, այդպես էլ պետք է հասկանալ։ Այլապես սխալից չենք կարող խուսափել, եթե, ասենք, Եվսեբիոսի կամ Յակոտ ալ-Համավիի այս տեղեկություններն էլ ենթարկենք սելևկյան տոմարի ամենազոր ուժին, ինչպես վարվել ու վարվում են այդ տեսակետի պաշտպանները։

Այսքանից հետո դժվար է համակերպվել պատմագիտության մեջ իշխող այն կարծիքին, թե Ալեքսանդրի անվան հետ կապված ժամանակագրական ամեն մի տեղեկություն, ինչպես Գ. Սարգսյանը կասեր՝ ուրեմն էլ ու այն հանդիպի, պետք է բացատրել սելևկյան էրայով։ Ինչպես համակերպվել, երբ զգալի է թիվն այն մատենագիրների՝ Եվսեբիոս Կեսարացի, Հակոբ Զգոն, Անանուն (Ա), Խորհրդային, Խորհրդային միջնադարյան հետազոտողներից շատերը, Յակոտ ալ-Համավի, զուցե և ուրիշներ՝ այս առումով մեզ առ այժմ անժանոթ, որոնք շեղվում են այդ ընդհանրացնող «օրենքից»։ Ավելին, վերոհիշյալ հեղինակների մոտ եղած դաստիարակությունը գալիս են ասելու, որ Ալեքսանդր Մակեդոնացու անվան հետ կապված ժամանակագրական տեղեկությունները չի կարելի միակերպ բացատրել, որ մի դեպքում նկատի է առնված ու պետք է նկատի առնել նրա թագավորության սկիզբը՝ 336 թ. (մ. թ. ա.), մյուս դեպքում՝ տիեզերակայունության տարեթիվը՝ 330 թ. (մ. թ. ա.), երրորդ դեպքում՝ մահվան թվականը՝ 323 թ. (մ. թ. ա.)։

Առանձնացնելով այս հեղինակների տեղեկությունները, վիճարկվող տեսակետի հիմքում գրեթե ոչինչ չի մնում և դրանով իսկ այն կորցնում է իր ուժը։ Մեղ խոսքն, իհարկե, այն տեղեկությունների մասին չէ, որոնք վերաբերում են սելևկյան ու ալեքսանդրյան թվականների նույնացման խնդրին։ Այսպիսի դաստիարակություն կան և քիչ չեն, երբ ալեքսանդրյան կամ Ալեքսանդրի թվագրությունն ասելով սելևկյանն է հասկացվել¹², որը, սակայն, ինչպես նախապես նշվել է, բնավ կապ չունի քննարկվող հարցի հետ։ Բանն այն է, որ ոչ միայն չի կարելի հավաստությունն ունենալ Ալեքսանդր Մակեդոնացու թագավորության այս կամ այն տարին հիշատակող ժամանակագրական տեղեկությունների միջև, այլև՝ սրանց ու ալեքսանդրյան կոչված թվագրության միջև։ Ահա այս

¹¹ Տե՛ս նույն տեղում, էջ 191, 238, 262։

¹² Կան, իհարկե, նաև բացառություններ, որոնք հարկադրում են ուշադիր լինել անգամ այս դեպքում։ Նկատի ունենք Յակոտ ալ-Համավիի օրինակը և ենթադրում ենք, որ նմանները կլինեն։

Քյարևոր հանգամանքն է նաև, որ անտեսվել է Սեն-Մարտենի, Հ. Տաշյանի, Գ. Սարգսյանի և ուրիշների կողմից ու պատճառ է դարձել խորենացու և այլոց (Հակոբ Զգոնի, Անանունի, խորենացու հետևորդների) սխալ մեկնաբանություն: Պատճառ է դարձել, որ հիշյալ բոլոր հեղինակների տեղեկությունները նրանք անուղղակի հասկանան... իսկ մենք գտնում ենք, որ խորենացու վիճարկվող տեղեկությունները պետք է անսխալ մանրամասն ուղղակի հասկանալ: Սա է, մեր կարծիքով, հարցալուծման միակ անսխալ ուղին, եթե, իհարկե, ուսումնասիրողը կաշկանդված չէ պատմագիտական նախապաշարումներով, եթե նա, իրոք, ոչ միայն տեսականորեն, այլև գործնականում հավատարիմ է խորենացուն խորենացիով հասկանալու սկզբունքին:

* * *

Մեր երկրորդ առաջարկը վերաբերում է պարսից Արշակունի առաջին երկու գահակալների գահատարիների հարցին, այն հարցին, որ խորենացու երկի մեղ հասած գահատարիների փոխարեն՝ Արշակ Բաջ՝ 31, Արտաշես՝ 26, պետք է ընդունել Ասողիկինը՝ Արշակ Բաջ՝ 57, Արտաշես՝ 31 և սրանք համարել խորենացու սկզբնագլուխ տեղեկություններ: Այս բանին հիմք են ծառայել Ասողիկի և Անանունի¹³ ավանդած համապատասխան տվյալները և այն, որ նրանք, ինչպես գրում են, ընդօրինակել են խորենացուն:

Սակայն այստեղ էլ Գ. Սարգսյանը տրամադրված չէ Անանունի հաղորդմանը հավատալուն: Եվ այդ բնական է, քանի որ մեր առաջարկներից յուրաքանչյուրի հաստատումը ոչ միայն նրա կաղմած ժամանակագրության, այլև այդ ժամանակագրությանը նվիրված աշխատության հերքումն է նշանակում: Ահա թե ինչու նա օգնության է կանչում Ն. Ադոնցին ու Գ. Արդարյանին, որոնցից առաջինը՝ սոսկ նշմամբ, — գրում է նա, — իսկ երկրորդը՝ մանրամասն համադրությունների հիման վրա, հայտնել են այն միտքը, որ Անանուն պատմիչը թեև հիշատակում է և՛ խորենացուն, և՛ Ասողիկին, բայց իրականում արժողաբեր է միայն Ասողիկից: Նշենք, — ավելացնում է Գ. Սարգսյանը, — որ այս ասված է ժամանակագրական տվյալների հետ ոչ մի առնչություն չունեցող նկատառումներով» (էջ 130):

Անառարկելի համարելով սույն կարծիքը, Գ. Սարգսյանն այնուհետև շարունակում է. «...Շահինյանը լոկ խոսքերով է մերժում Ն. Ադոնցի և Գ. Արդարյանի տեսակետը, հակադրելով դրան սոսկ Անանունի հայտարարությունը (որին հիշյալ հեղինակները առանց իր օգնության էլ քաջատեղյակ են) և որպես ապացույց ծառայեցնելով դեռևս ապացուցելին» (էջ 130):

Մի կողմ թողած սույն պարբերության «լոկ խոսքերով է մերժում» ավելորդ միտքը (ավելորդ, որովհետև ինքն էլ է ասում, որ մենք Ն. Ադոնցի ու Գ. Արդարյանի տեսակետին հակադրել ենք Անանունի հաղորդումը), ներկա պահին կարևորն այն է, թե ինչով է Անանունի հաղորդումը, որն ըստ Սարգսյանի հայտարարություն է, անհավատալի կամ ապացուցելի համարվում, իսկ Ն. Ադոնցի և Գ. Արդարյանի կարծիքը՝ անառարկելի ճշմարտություն: Ավելին, ինչու է Գ. Սարգսյանը մոռանում, որ Անանունի նույն հատվածի և խորենացու

¹³ Այս Անանունը Սեբեոսի աշխատությանը կից պարսից Արշակունիների երկրորդ արքայացուցակի հեղինակն է (Տե՛ս Ս Ե Բ Ե Ռ Ս, Պատմություն, Երևան, 1939, դ. Գ), որին համարելու ենք Անանուն Բ՝ նույն աշխատությունում եղած մյուս երկու Անանուններից (Անանուն Ա, Անանուն Գ) տարբերելու նպատակով:

ցու համապատասխան տեղեկությունների անմիջական կապը (հետևաբար Անանունի անմիջական ծանոթությունը Խորենացու հետ) ոչ պակաս հաջողությամբ և մանրամասն համադրություններով ապացուցել է Ստ. Մալխասյանը¹⁴ (դարձյալ ժամանակագրական խնդիրների հետ ամենևին կապ չունեցող նկատառումներով), որը ավելի խնդրում ավելի է համոզում, քան Գ. Աբգարյանը։ Ի վերջո, ինչու է մոռանում Դ. Սարգսյանը, որ այս Անանունի՝ Խորենացուց օգտվելու պարագան այնքան ակնբախ է, որ համարյա կասկած չի հարուցել անցյալում, եթե, իհարկե, նկատի չունենանք պրոֆ. Ն. Ադոնցի և Գ. Աբգարյանի կարծիքը։

Մեր կարծիքով, Ասողիկը հանդիսացել է մի տեսակ միջնորդ օղակ Խորենացու և Անանունի միջև։ Մի հեղինակ, որն իր կատարած գործով ավելի է թեթևացրել Անանունի աշխատանքը։ Անանունը պարզապես օգտվել է նաև Ասողիկի ծառայությունից, քանի որ վերջինս, ինչպես տեսնում էր Անանունը (իսկ այդ նա կտեսներ Խորենացու երկը ձեռքի տակ ունենալիս, և ոչ թե Ասողիկին կուրորեն հավատալով, ինչպես պնդում է Դ. Սարգսյանը), ժամանակին արել էր իր կատարելիք աշխատանքի մեծ մասը՝ համառոտադրելով և Խորենացու երկից առանձնացնելով Պարթևների արքայացանկը։ Հենց այս առումով է Ասողիկը արժանացել Անանունի ուշադրության, և հատկապես այն բանից հետո, երբ Անանունը Ասողիկի մոտ տեսել է Խորենացու՝ իրեն հետաքրքրող տեղեկությունների հարազատ կրկնությունը։ Հավատացած ենք, եթե Անանունը տեսներ, որ Ասողիկը բուն հարցերում (Պարթևների հաջորդականության, անունների և գահատարիների) տարբերվում է Խորենացուց, բնավ էլ նրան չէր վկայակոչի, այլ կբավարարվեր միայն Խորենացիով։ Եվ ինչու՞ պետք է վկայակոչեր, երբ նա չէր կարող չիմանալ ու, իրոք, իմացել է (այս բանը չի ժխտում ոչ Գ. Աբգարյանը, ոչ էլ Գ. Սարգսյանը), որ Ասողիկի սկզբնաղբյուրը Խորենացին էր, իսկ Ասողիկը մի սովորական ընդօրինակող էր, ինչպես ինքը։

Բացի այս, ինչպես երևում է Սերևոսի աշխատության երրորդ գլխի խորագրից, Անանունը իր առջև լուրջ և պատասխանատու խնդիր է դրել՝ ըստ հավաստի և ճշմարիտ մատենագիրների երկրորդել Պարթևների (ենթադրվում է նաև հայ Արշակունիների) արքայացանկը, ցուցաբերելով քննադատական վերաբերմունք մեզ առայժմ անհայտ մեկ ուրիշ հեղինակի (Անանուն Ա-ի) կասկածելի ժամանակագրության նկատմամբ։ Այսպիսի նպատակ ունեցող հեղինակը մի՞թե կարող էր հենվել միայն Ասողիկի վրա և հենց այնպես հայտարարել թե ընդօրինակել է նաև Խորենացուն։ Ո՛չ, չէր կարող, եթե այստեղ գոնե փորձում ենք հավատալ հեղինակին, իսկ չհավատալու որևէ հիմնավոր պատճառ չկա։

Ի դեպ, ոչ թե մենք է, որ այդպիսի պատճառ չենք նկատում, այլ, թող դարմանալի չերևա, ցույց չեն տվել անգամ Անանունին չհավատացողները։ Օրինակ, Ն. Ադոնցը սոսկ կարծիք է հայտնել¹⁵։ Գ. Աբգարյանը բավարարվել է Խորենացու, Ասողիկի և Անանունի համապատասխան տեղեկությունների (այն էլ մի մասի՝ մինչև «...ի վերայ աշխարհիս Հայոց») հատվածների լոկ վկայա-

¹⁴ Ստ. Մալխասյանց, Սերևոսի Պատմությունը և Մ. Խորենացի, Թիֆլիս, 1899, էջ 35—41։

¹⁵ Н. Адонц, Начальная история Армении у Себеоса в ее отношениях к трудам Моисея Хоренского и Фауста Византийского (տե՛ս «Византийский временник», 1901, вып. 1—2, էջ 69)։

կոչումով¹⁶։ Փաստորեն նա ոչ միայն չի նշել իր կարծիքը հիմնավորող հանգամանքները, այլև բաց է թողել համեմատելի բուն հատվածները՝ Պարթևների արքայացանկերը, որոնք վկայակոչված հատվածների հետ միասին հենց իր տեսակետի դեմ են խոսում։ Իսկ ի՞նչ է արել Գ. Սարգսյանը։ Նախ, տեղի «սղուրջունը» ստիպել է նրան հրաժարվելու «Ասողիկի, Անանունի և Խորենացու համապատասխան հատվածների խիստ պերճախոս համադրությունից»։ որոնք, իբրև թե, պետք է իր կարծիքը «հաստատեն»։ Խեղճուհ, որպեսզի Գ. Սարգսյանը Անանունին հավատար, այսինքն հավատար, որ նա անմիջապես ծանոթ էր և ընդօրինակել էր նաև Խորենացուն, պետք է վերջինի տեքստը որևէ, գոնե փոքր, աղբյուրություն թողներ Անանունի վրա, որի հետքն անգամ, ըստ Սարգսյանի, չկա։ «Ասենք,— ավելացնում է Դ. Սարգսյանը,— կնշվեր, թե Արշակը, թագավորեցնելով Վաղարշակին՝ իր երկրորդն է դարձրել, ինչպես ասված է Խորենացու մոտ, կամ մի, թեև ուղ աննշան բան»։ Խեղճուհ, իրավացի համարելով ն. Ադոնցին ու Գ. Աբգարյանին, Դ. Սարգսյանը, ի տարբերություն նրանց, զարմանալիորեն իմացել է, որ «Անանուն պատմիչը պարզապես չի ունեցել (կամ այդ ժամանակ ձեռքի տակ չի ունեցել) Խորենացու երկր»։

Բայց ինչու մոռանալ, որ Խորենացին միջնադարյան Հայաստանում, հատկապես X և հետագա դարերում, ոչ միայն անառարկելի հեղինակություն էր, այլև նրա գործը դասագիրք էր հայոց դպրոցներում։ Ուրեմն, այդ ինչպե՞ս պատահեց, որ այսքան մասնայակատություն վայելող մի գործ (ապացույց թեև ուղ դարերի փոթորիկների միջով մեղ հասած նրա հինգ տասնյակ ձեռագրերը։ XI—XII դարերում նրան ընդօրինակած հեղինակների բազմաթիվ ու բազմապիսի տարբերությունները՝ X դարի հեղինակների համեմատությամբ և այլն) Անանունը ձեռքի տակ չունեցավ։

Բացի այդ ավելորդ է Անանունից պահանջել, որ նա շեղվեր բուն նպատակից։ Այսինքն Պարթևների արքայացանկը «ծաղկեցներ» այնպիսի տեղեկություններով, որ Խորենացին ունենար, իսկ Ասողիկը չունենար։ Ինչ վերաբերում է «փոքր» կամ «աննշան» բանին, որը ցույց տար Խորենացու անմիջական աղբյուրությունը, Անանունը, իրոք, ունի, և աննկատ է մնացել Գ. Սարգսյանին։ Այսպես, Գ. Սարգսյանը քաջատեղյակ է, որ պարթև VI գահակալը Խորենացու մոտ (եթե նկատի չառնենք գրչական դանադան սխալ տարբերակները) հանդես է գալիս կրկնանունով՝ Արշեղ (Արշես) և Արտաշես (Բ, 18, 19)։ Ասողիկը նույն գահակալի համար օգտագործել է Արտաշես տարբերակը, իսկ Անանունի մոտ Արշես է։ Սա, մեր կարծիքով, Գ. Սարգսյանի ցանկացած «աննշան» բաներից է, որը հենց Խորենացու անմիջական աղբյուրությունն է նշանակում։

Չնայած կարևոր են, սակայն թողնենք «աննշան» բաները, քանի որ Խորենացու անմիջական աղբյուրությունը հաստատող ավելի մեծ փաստեր կան Անանունի մոտ և ակնբախ են։ Այնքան ակնբախ, որ, եթե Ասողիկը շիճեւ, ոչ մի հետազոտող բնավ չէր ասի, թե Անանունի անմիջական սկզբնաղբյուրը Խորենացին չէ։ Դրանք այն նույնաման տեղեկություններն են, որոնք առկա են ինչպես Խորենացու, այնպես էլ Անանունի մոտ՝ նրանց ավանդած արքա-

¹⁶ Գ. Արգարյան, Սերեոսի «Պատմությունը» և Անանունի առեղծվածը, Երևան, 1965, էջ 56, ծանոթ. 59, էջ 63։

յայտուցականերում¹⁷։ Անանունը, փաստորեն, ոչ միայն հաղորդել է Պարթևների արքայացանկը ըստ Խորենացու ներկայացնելու մասին, որին կարելի էր հավատալ կամ չհավատալ, այլ, իրոք, կատարել է իր խոստումը, որին արդեն անկարելի է չհավատալ։

Սակայն մի պահ մոռանանք Անանունին, իսկ Ասողիկը։ Ձէ որ Ասողիկի մոտ Պարթև առաջին արքաների գահատարիները նման չեն Խորենացու մեզ հասած համապատասխան գահատարիներին, չնայած իր վկայությամբ դրանք նույնպես ընդօրինակված են Խորենացուց¹⁸։ Արդ, որ գահատարիները համարել Խորենացու սկզբնագիր տեղեկություններ՝ Խորենացունը, թե՛ Ասողիկինը։ Այս հարցը ի վերջո մտահոգել է նաև Գ. Սարգսյանին, որի առթիվ նա ուշադրություն է հրավիրել հետևյալի վրա։ Նախ, շոշափելով հարցի հնագրական կողմը, ընթերցողին հայտնել է, որ ինչպես Խորենացու մեզ հասած բոլոր ձևադրերում, այնպես էլ նրա միջնադարյան հետևորդների մոտ (բացի Ասողիկից ու Անանունից) վիճարկվող գահատարիները համարյա տարբերակվածներ չունեն։ Երկրորդ, ըստ Գ. Սարգսյանի «գրեթե դերոյի է հավասար» այն քանի հավանականությունը, որ շորս, այն էլ տարբեր նիշեր՝ «ԼԱ» և «ԻՁ», դանգվածային ձևով փոփոխվել են ու դառնային «Ծէ» և «ԼԱ»։ Երրորդ, Ասողիկից ավելի վաղ ապրող հեղինակ Ուխտանեսի մոտ Պարթև առաջին արքաների համար նույն գահատարիներն են, ինչ որ կան Խորենացու մեզ հասած ձևագրերում (էջ 131—132)։ Այսպիսով, ինչպես եզրակացնում է Գ. Սարգսյանը, «Ասողիկը՝ առաջին երկու պարթև արքաների գահատարիների հաղորդած իր թվերով, լրիվ մեկուսանում է, դառնում առանձնակի երևույթ։ Նրանից առաջ էլ, նրանից հետո էլ,— շարունակում է Գ. Սարգսյանը,— ունենք այն թվերը, որոնք հայտնում է Խորենացին, ուստի և բնական է նշված փոփոխության պատճառները փնտրել հենց Ասողիկի մեջ, և տյո՛ղ խնդրի քննությունը վերապահել ոչ թե Խորենացիագիտությանը, այլ Ասողիկի պատմության ուսումնասիրությանը» (էջ 132—133)։

Գ. Սարգսյանի հաջորդ գործը լինում է այն, որ նա (թեպետ անցողակի) քննության է առնում Ասողիկի «Պատմության» համապատասխան հատվածները, որոնց քիչ հետո կանդրադառնանք, և հանգում հետևյալ եզրակացություններին. «Նա (Ասողիկը— Լ. Շ.) ինչ-ինչ պատճառներով վտարել է պարթևական արքայացանկից երկրորդ գահակալ Արտաշեսին...», որ «Արշակ Քաջին այստեղ (Ասողիկի մոտ— Լ. Շ.) հատկացված 57 տարին ճիշտ և ճիշտ հավասար է Խորենացու մոտ Արշակ Քաջին և նրա որդի Արտաշեսին տրված գահատարիների դումարին ($31 + 26 = 57$)», որ «կարծես թե Արտաշեսը հեռացել է՝ զանադարիները քողնելով իր հորը» (էջ 133, ընդգծումները մերն են— Լ. Շ.)։

Ասողիկի վերոհիշյալ գահատարիների մասին նույն կարծիքը առաջին անգամ հայտնել է բազմավաստակ հայագետ Ստ. Մալխասյանը՝ Ասողիկի «Տիեզերական պատմության» 1885 թ. հրատարակության 39-րդ ծանոթության մեջ, որին, առանց քննադատական մոտեցման, հետագայում համամիտ են գտնը-

17 Տե՛ս Խորենացի, Բ, 2, 3—9, 68—69, հմմտ. Սերեոս, Պատմութիւն, Երևան, 1939, 41. Գ.։

18 Տե՛ս Ստեփանոս Տարոնեցի (Ասողիկ), Պատմութիւն տիեզերական, ՍՊԲ, 1885, էջ 53։

վել Հ. Տաշյանը¹⁹ և Գ. Արզարյանը²⁰։ Այսուհանդերձ հիշյալ կարծիքը, որով Ասողիկին վերագրվում է խիստ քմահաճ մատենագրի դեր, զանաառիների գումարալին, սոսկ պատահական հավասարության վրա հենված անհավանական ենթադրություն է և որևէ փաստով չի հիմնավորվում։ Դրա անհավանականությունը երևում է անմիջապես, երբ փորձում ենք պատճառաբանել, թե ինչու կամ ի՞նչ անհրաժեշտությունից զրգված պետք է Ասողիկը Պարթև արքաների գահատարիները գումարեր և այդ գումարը հատկացնել միայն մեկին։

Ի դեպ, Գ. Սարգսյանը ճիշտ է վարվել, որ ուշադրություն է հրավիրել սույն հարցի վրա, սակայն նույնքանով էլ սխալ է նա, երբ, իր առաջադրած հարցի պատասխանը գտնել չկարողանալով, ավելացրել է. «Իսկ Լ. Շահինյանը, նախքան Ասողիկի... տվյալները անվերապահորեն օգտագործելը, պարտավոր էր թանգել հանգույցը, լուծել Ասողիկի այս ներքին հակասությունները» (էջ 133)։

Արդ, թույլ տանք հարցնելու՝ իսկ ինչու՞ Լ. Շահինյանը։ Ինչու՞ է Լ. Շահինյանը պարտավոր քանդել «հանգույցը» կամ լուծել Ասողիկի «ներքին հակասությունները», երբ յուրեք. իրականում, արհեստական հակասություններ են և ի հայտ են գալիս Գ. Սարգսյանի պաշտպանած կարծիքի դեպքում։ Ուրեմն, տվյալ խնդրում պարտավոր է ինքը՝ Գ. Սարգսյանը, իսկ Շահինյանը ամենևին էլ պարտավոր չէ, քանի որ նրա համոզումով Ասողիկը ղերծ է նման «հակասություններից»։ Ավելին, մեր համոզումով, եթե Ասողիկը ծանոթ լիներ Արշակ Քաջի և Արտաշեսի այն գահատարիներին, որոնք հասել են հորենացու մեզ ծանոթ ձևագրերով՝ Արշակ Քաջ՝ 31, Արտաշես՝ 26, այսպես էլ ընդօրինակելու էր՝ առանց գումարման կամ հանման թվաբանական գործողությունների Կվարվեր այնպես, ինչպես վարվել է հորենացու այլ տեղեկությունների նկատմամբ՝ մնացած բոլոր դեպքերում (խոսքը մինչև խոսքով Մեծ ժամանակահատվածի մասին է), ինչպես վարվել են հորենացու միջնադարյան բոլոր հետևորդները։ Իսկ ինչու է, Ասողիկը կարող էր իմանալ, որ գործ ունի ոչ թե պատահական թվերի, այլ պատմական փաստերի հետ և այդքան կամայաբար չէր վարվի հորենացու տեղեկությունների նկատմամբ։ Բացի այս, Ասողիկի «Պատմություն» համապատասխան բաժինների ուսումնասիրությունից երևում է, որ նա ունի պատճառ չունի երկու առանձին գահակալների գահատարիները գումարել և հատկացնել միայն մեկին։ Այդպիսի նվաճավոր պատճառ ցույց չեն տվել ո՛չ նախորդները, ո՛չ էլ Գ. Սարգսյանը և, հավատացած ենք, որ այդ բանը հնարավոր էլ չէ ցույց տալ։

Երբ հանգամանքներն ծանոթանում ենք Ասողիկի, ինչպես նաև հորենացու համապատասխան տեղեկություններին, պարզվում է, որ Ասողիկը ոչ միայն չի վարվել այնպես, ինչպես կարծում են, այլ, ընդհակառակը, նրա շնորհիվ մեզ են հասել հորենացու սկզբնաղբի տեղեկությունները, որոնք կարևորագույն դեր ունեն իր իսկ՝ հորենացու ամբողջ ժամանակագրության նախնական պատկերը վերականգնելու համար։

Համոզվելու համար նախ, որոշ վերապատմումով, դիմենք Ասողիկի՝ տվյալ խնդրին վերաբերող տեղեկություններին։ Խոսելով Արշակունիների անկախացման մասին, թե ինչպես Արշակ Քաջը Ալ. Մակեդոնացու մահվանից 60

19 Հ. Տաշյան, Արշակունի դրամներ, մասն Բ, Վիեննա, 1960, էջ 357 և հտ.։

20 Գ. Արզարյան, նշվ. աշխ., էջ 63, ծանոթ. 71։

տարի հետո և Անտիոքոս Բևոսի թագավորության 11-րդ տարում ասպտամրվել ու զուրս է եկել Մակեդոնացիների գերիշխանությունից, Ասողիկը շարունակում է. «Հալածէ (Արշակ Քաջը—լ. Շ.) և ի Բաբելոնէ զՄակեդոնացւոց իշխանութիւնն և քաղաւորէ ընկ ամեհայն՝ ամս Ծէ (57)»:

Եւ յետ նորա որդի նորա Արտաշէս ամս ԼԱ (31): Եւ յետ սորա թագաւորէ սորին որդի (Արտաշէսի— լ. Շ.) Արշակ, որ կոչեցաւ Մեծ»²¹:

Ապա, մի պահ թողնելով Պարթև հաջորդ գահակալների թվարկումը, և անգամ Արշակ Մեծի պահատարիքը շնչելով, Ասողիկն սկսում է պատմել սելևկյան արքաներ Դեմետրիոսի և վերջինիս եղբայր Անտիոքոս Սիդեացու դեմ Արշակ Մեծի մղած պատերազմների մասին, նկարագրում է Անտիոքոս Սիդեացու պարտությունն ու մահը և հայտնում. «Յայնմ ժամանակի Արշակ Մեծ քոռն Արշակայ Քաջի թագաւորեցոյց զեղբայր իւր զՎաղարշակ ի վերայ աշխարհիս Հայոց: ...և ինքն չուեալ գնաց ի Բահլ»²²:

Այս միջանկյալ պատմությունից հետո, որով ընդհատվել էր Պարթևաց արքայացանկը, Ասողիկն անմիջապես շարունակում է. «Արդ այսպէս զատուցեալ Իրեին երկու ցեղքն թագաւորութեանց, Պարսիցն և Հայոցն»:

Արշակ Քաջ՝ նախնեաց երկուց ցեղից, թագաւորեցելոյ Պահլաւականին և Արշակունւոյն՝ ամենայն քաջութեամբ թագաւորեաց ամս Ծէ (57). յետ որոյ որդին զատուցեալք քաղաւորք Պարսից. Արշակ Մեծ ամս ԾԲ (52)...» և այլն²³, եւլ այսպես՝ սկսած Արշակ Մեծից ու Վաղարշակից, Ասողիկի մոտ հաջորդաբար թվարկված են նախ՝ պարսից և ապա՝ հայ Արշակունիները, նրանցից յուրաքանչյուրն իր գահատարիքով:

Ինչպես երևաց, Ասողիկը Արշակ Քաջի, ինչպես նաև նրա թագավորության տևողությունը հիշատակել է ոչ թե մեկ, այլ երկու անգամ, երկու անգամն էլ նրան տվել է 57-ամյա թագավորության ժամանակաշրջան: Կարևոր է հատկապես Արշակ Քաջի մասին Ասողիկի առաջին տեղեկությունը, որովհետև նրա 57-ամյա թագավորության կողքին հիշատակված է նաև իր որդի և հաջորդ Արտաշեսը՝ 31-ամյա թագավորությամբ: Ուրեմն, եթե անգամ ընդունելու լինենք, որ Ասողիկի մոտ Արշակ Քաջին հատկացված 57 տարին խորհնացու համապատասխան գահատարիների գումարն է, այնքամ հարկադրված կլինենք նրա աշխատությունից հանել՝ «...յետ նորա (խոսքն Արշակ Քաջի մասին է— լ. Շ.) որդի նորա Արտաշէս ամս ԼԱ (31)» տողը: Ավելին, Արտաշեսի գոյությունը հաստատող ապացույցներ են նաև Ասողիկի այն դուգահեռ տեղեկությունները, որոնց համաձայն Արշակ Մեծը ոչ թե որդին, այլ քոռն է համարված Արշակ Քաջի, պարզ ասած, Ասողիկը Արտաշեսին հատկացրել է ժառանգական նույն ծագումն ու տեղը, ինչպես խորհնացու և իր միջնադարյան մյուս հետևորդների մոտ է:

Որ Ասողիկի մոտ Արշակ Քաջի 57 տարին խորհնացու համապատասխան գահատարիների գումարը չէ, որ Արտաշեսը չի վտարված պարթևական արքայացանկից և թագավորել է Արշակ Քաջից անմիջապես հետո 31 տարի, ի վերջո, Ասողիկի մոտ են պահպանվել խորհնացու սկզբնագիր գահատարիները՝ Արշակ Քաջի և Արտաշեսի համար, ապացուցվում են նաև հետևյալ փաստերով:

²¹ Ա ս ո ղ ի կ, էջ 29:

²² Նույն տեղում, էջ 30:

²³ Նույն տեղում, էջ 31:

ա. Քանիցս ասվել է, որ ըստ հորենացու և ըստ Ասողիկի Արշակ Քաջը իր թագավորությունն սկսել է Ալեքսանդր Մակեդոնացու մահվանից 60 տարի հետո (տե՛ս հորենացի, Բ, 1—2, հմմտ. Ասողիկ, էջ 29)։ Համոզված ենք, որ այդ տարեթիվը ըստ նրանց 262 թ. է (մ. թ. ա.), սակայն, նկատի ունենալով հարցի շուրջը եղած և առայժմ վիճելի երկու կարծիքը (մեկը Գ. Սարգսյանի պաշտպանածը), Արշակ Քաջի զահակալության սկիզբը ընդունենք նաև 251 թ. (մ. թ. ա.)։

բ. հորենացու մեկ ուրիշ տեղեկությամբ Պարթև շորորոզ զահակալ Արշականը զահը ժառանգել է հայ Արշակունիների հարստության հիմնադիր Վաղարշակի թագավորության 13-րդ տարում (տե՛ս հորենացի, Բ, 68)։ Ուրեմն, համաձայն այս տեղեկության, Վաղարշակն ու հիշյալ Արշականի անմիջական նախորդ Արշակ Մեծը 12 տարով համաժամանակյա թագավորներ են եղել։

գ. Արշակ Մեծը հորենացու մեզ հասած ձեռագրերով թագավորել է ՄԴ—53 (Բ, 68), իսկ ըստ Ասողիկի՝ ՄԲ (52) տարի (Ասողիկ, էջ 31), հետևաբար Վաղարշակը թագավորել է նրա իշխանության 41 կամ 40-րդ տարվանից։

դ. Ինչպես հորենացին, այնպես էլ Ասողիկը վկայում են, որ Վաղարշակին թագադրել է Արշակ Մեծը այն ժամանակ, երբ սպանվել է սելևկյան զահակալ Անտիոքոս Միգևացին (տե՛ս հորենացի, Բ, 2—3, հմմտ. Ասողիկ, էջ 30)։ Վերջինիս սպանությունը, ըստ պատմագիտության, տեղի է ունեցել 128 կամ 127 թ. մ. թ. ա. (վերցնելու ենք մեկը՝ 128 թ.), ըստ հորենացու մեր վերականգնած ժամանակագրության՝ 134 թ. (մ. թ. ա.)²⁴։ Ըստ Ասողիկի՝ եզրույթական զահակալ Պտղոմեոս Եվգերտես 11-ի 12-րդ տարում (տես էջ 77), այսինքն դարձյալ 134 թ. (մ. թ. ա.), որովհետև վերջինս, ինչպես ընդունված է և ինչպես եվսեբիոս Կեսարացու մոտ է, թագավորել է 145 թվականից (մ. թ. ա.), իսկ Ասողիկը Պտղոմեանների ժամանակագրության հարցերում հետևել է Եվսեբիոսին։

հորենացու և Ասողիկի վկայակոչված այս տեղեկություններից բացահայտ երևում է, որ Արշակ Քաջի թագավորության սկզբից մինչև Արշակ Մեծի 41-րդ տարին կամ, որը նույնն է, մինչև Վաղարշակի զահակալումն ընկած ժամանակահատվածի տևողությունը սլետք է հավասար լինի Պարթև առաջին երկու արքաների զահատարիների գումարին, սրան էլ ավելացրած երրորդ զահակալ Արշակ Մեծի 40 տարին։

Գահատարիների այս գումարը հորենացու մեզ հասած տեղեկությունների համաձայն 97 տարի է՝ Արշակ Քաջ՝ 31 + Արտաշես՝ 26 + Արշակ Մեծի 40 տարին։ Եթե հետևելու լինենք Գ. Սարգսյանի պաշտպանած տեսակետին, նույնքան տարի էլ Ասողիկի մոտ է՝ Արշակ Քաջ՝ 57 + Արշակ Մեծի 40-ը, իսկ մեր կարծիքով Ասողիկի մոտ այն հավասար է 127 կամ 128 տարվա՝ Արշակ Քաջ՝ 57 + Արտաշես՝ 31 + Արշակ Մեծի 39-ը կամ, որն ավելի հավանական է, 40 տարին։

Այժմ փորձենք գահատարիների հիշյալ գումարները (97 և 128) ղեկավար պատմական այն ժամանակահատվածում, որը նույնաբար նշել են հորենացին ու Ասողիկը և տեսնել, թե ո՞ր գահատարիներն են լինելու հորենացունր և ղեկավար, և ինչպե՞ս այն բանից, որ տվյալ ժամանակահատվածի սահմանագծային տարի-

²⁴ Տե՛ս «Բաները Մատենադարանի», № 8, Երևան, 1967, էջ 48—49՝ ներդիր աղյուսակ։

թվերի շուրջը կտն և կարող են լինել տարակարծություններ, նպատակահարմար է հարցը քննել հետագայում բոլոր հղանականներով:

Առաջին. հնթագրեր, որ ըստ Խորհնացու իրոք Արշակ Քաջը թագավորել է 251 թ. (մ. թ. ա.), իսկ 128 թ. (մ. թ. ա.) Արշակ Մեծի 41-րդ, Անտիոքոս Սիդիացու սպանության և Վաղարշակի թագադրման տարին է: Միջանկյալ ժամանակաշրջանը, ինչպես տեսնում ենք, 123 տարի է (251—128), որը Խորհնացու՝ մեզ հասած գահատարիների գումարից ավելի է 26 տարով (123—97):

Երկրորդ. 251 թ. (մ. թ. ա.)՝ Արշակ Քաջի գահակալում, 134 թ. (մ. թ. ա.)՝ Արշակ Մեծի 41-րդ, Անտիոքոս Սիդիացու սպանության, Վաղարշակի թագադրման տարեթիվ: Միջանկյալ ժամանակաշրջանը՝ 117 տարի (251—134), որը ավելի է Խորհնացու «նշած» գահատարիների գումարից 20 տարով (117—97):

Երրորդ. 262 թ. (մ. թ. ա.)՝ Արշակ Քաջի գահակալում, 128 թ. (մ. թ. ա.)՝ Արշակ Մեծի 41-րդ, Անտիոքոս Սիդիացու սպանության, Վաղարշակի թագադրման տարեթիվ: Միջանկյալ ժամանակաշրջանը՝ 134 տարի (262—128). ավելի է Խորհնացու «նշածից» 37 տարով:

Չորրորդ. 262 թ. (մ. թ. ա.)՝ Արշակ Քաջի գահակալում, 134 թ. (մ. թ. ա.)՝ Արշակ Մեծի 41-րդ, Անտիոքոս Սիդիացու սպանության և Վաղարշակի թագադրման տարեթիվ: Միջանկյալ ժամանակահատվածը 128 տարի է (262—134), որը ավելի է Խորհնացու «նշած» գահատարիների գումարից 31 տարով (128—97):

Այս հաշվումները, որոնք կատարվեցին Խորհնացու մեզ հասած գահատարիների և նրա համապատասխան տեղեկություններից ենթադրված հավանական տարեթվերի հիման վրա, պարզ ցույց են տալիս, որ Արշակ Մեծը չէր կարող ո՛չ Անտիոքոս Սիդիացուն սպանել, և ո՛չ էլ Վաղարշակին թագադրել: Երբ ունենալով այդ տեղեկությունները, 20, 26, 31 կամ 37 տարի առաջ նա կնքած կլիներ իր մահկանացուն: Վիճակը չի փոխվում նաև, եթե հաշվի մեջ ներառենք Արշակ Մեծի թագավորության ամբողջ տեղումները: Այսինքն, հակառակ Խորհնացու հնթագրեր, որ նա այդ գործերը կատարել է ոչ թե իր թագավորության 41-րդ տարում, այլ ամենավերջին տարում, ասենք 53-րդին: Այս անգամ էլ Արշակ Մեծը մահացած կլիներ հիշյալ տարեթվերից 7, 13, 18 կամ 24 տարի առաջ:

Այսպիսով, բացահայտ անհամաձայնություն է ի հայտ գալիս մի կողմից՝ Խորհնացու պատմաժամանակագրական կամ նկարագրական բնույթի տեղեկությունների, մյուս կողմից էլ՝ նրա մեզ հասած գահատարիներով ու ենթադրյալ տարեթվերով կատարված հաշվումների միջև: Դրանով, իհարկե, կասկածելի են դառնում վերևում բերված բոլոր տվյալները՝ թե՛ Պարթև առաջին երկու արքաների գահատարիները, թե՛ սահմանագծային տարեթվերը, սակայն, մեր կարծիքով, կասկածելի առաջին հերթին գահատարիներն են, քանի որ քննության առնվեցին սահմանագծային հնթագրեր այն բոլոր տարեթվերը²⁵, որոնք կարող էին նկատի առնվել Խորհնացու կողմից:

25 Խորհնացու գահատարիների ստուգման համար կարելի է կատարել նաև այլ հաշվումներ՝ փոփոխելով Վաղարշակի թագադրման տարեթիվը: Բանն այն է, որ ըստ առանձին ուսումնասիրողների այդ իրադարձությունը, հետևաբար և Անտիոքոս Սիդիացու մահը, իբրև թե ըստ Խորհնացու, տեղի է ունեցել 153 (Կուշտիդ, Կ. Սարգսյան), 152 (Սեն-Մարտեն), 150, 145 (Զ. Գաթրճյան), 149 (Մ. Չամչյան) կամ 144 (Մ. Հմին) թվականներին (մ. թ. ա.): Սույն տարեթվերով, սակայն, 10 Հանդես, № 1

Այժմ դիմենք Ասողիկի ավանդած զահատարիներին: Ասողիկի զահատարիների ստուգման համար կա ընդամենը երկու հնարավորություն, որովհետև սահմանագծային տարեթվերից մեկը՝ Վաղարշակի թագադրման տարեթիվը, նրա մոտ առավել որոշակի է և տարակարծիքների տեղիք տալ չի կարող:

Առաջին. Լեթագրենք, թե ըստ Ասողիկի 251 թ. (մ. թ. ա.) Արշակ Քաջի թագավորության առաջին տարին է, իսկ 134 թ. (մ. թ. ա.) նրա մոտ, այսինքն Պտղոմեոս Եվերգեստես Բ-ի թագավորության 12-րդը, Անտիոքոս Սիդեացու սպանության և Վաղարշակի թագադրման տարին: Միջանկյալ ժամանակաշրջանը հավասար է 117 տարվա (251—134), որը սլակաս է նրա ավանդած զահատարիների գումարից 11 տարով (128—117): Այս հաշվով Արշակ Մեծը կաբող է Անտիոքոս Սիդեացուն սպանած լինել և թագադրել Վաղարշակին, սակայն դեռևս հարցի հավանական լուծումը չէ, քանի որ այդ գործերը նա կատարած կլինի իր թագավորության 30-րդ տարում, հակառակ հորենացու նշած 41-րդի:

Երկրորդ. 262 թ. (մ. թ. ա.)՝ Արշակ Քաջի թագավորության սկիզբ, 134 թ. (մ. թ. ա.)՝ Անտիոքոս Սիդեացու սպանության և Վաղարշակի թագադրման տարեթիվ: Միջանկյալ ժամանակահատվածը 128 տարի է, 128 տարի է նաև Ասողիկի ավանդած զահատարիների գումարը՝ Արշակ Քաջ՝ 57 + Արտաշես՝ 31 + Արշակ Մեծի 40 տարին:

Ինչպես տեսնում ենք, Ասողիկի ավանդած զահատարիների գումարը կատարելապես փոխհամաձայն է թե՛ իր և թե՛ հորենացու տեղեկություններով ենթադրված սահմանագծային տարեթվերի միջանկյալ ժամանակի տեղում: Դրանով, իրոք, Արշակ Մեծը կարող է իր թագավորության 41-րդ տարում սլարտության մատնել ու սպանել Անտիոքոս Սիդեացուն, թագադրել Վաղարշակին, ղուգահեռ թագավորել 12 տարի էլ, որից հետո գահի ժառանգորդ Արշականը Վաղարշակի 13-րդ տարվանից կսկսի իր թագավորությունը, ինչպես հորենացու մոտ է:

Այսպիսով, այնտեղ, ուր բացահայտ անհամաձայնություն կար հորենացու մեղ հասած ղուգահեռ տեղեկությունների միջև, այսպես ասած, ուր հորենացին «հակասում» էր ինքն իրեն, հնարավոր է դառնում լուսաբանել միմիայն Ասողիկի ավանդած զահատարիների միջոցով: Նման սլարագաներում, թվում է, անկարելի է կասկածելն անգամ, որ, իրոք, Պարթև առաջին երկու աբաների համար Ասողիկի ավանդած զահատարիներն են հորենացու սկզբնագիր տեղեկությունները, որ, հետևաբար, հորենացու մոտ այդ զահատարիները ենթարկվել են հետագա փոփոխությունների և դրանց վրա հենվել չի կարելի:

Այս բանը, իհարկե, սլացույց է նաև, որ Ասողիկի մոտ Արշակ Քաջին հատկացված 57 տարին ամենևին էլ հորենացու ձևագրերով մեղ հասած համասլատասխան զահատարիների գումարը չէ՝ Արշակ Քաջ՝ 31 + Արտաշես՝ 26, սակայն, նկատի ունենալով հարցի կարևորությունը, քննենք այն մեկ ուրիշ եղանակով:

Մի սլահ ընդունենք, թե ճիշտը Գ. Սարգսյանի սլաշտսլանած տեսակետն է, որի համաձայն Պարթև առաջին արքանների զահատարիների գումարը՝ մինչև

հաշվումներ կատարելը ավելորդ կլինի, որովհետև դրանք խիստ անհավանական տարեթվեր են, հիմնականում արգասիք են հորենացու վիճարկվող զահատարիների անքննադատ օղտագործման, մասամբ էլ սլամանավորված են ալլ, դարձյալ վիճելի հանգամանքներով:

Արշակ Մեծի թագավորության 41-րդը, հավասար է լինելու 97 տարվա։ Այս ժամանակաշրջանի սկիզբը Արշակ Քաջի թագավորության առաջին տարին է, որը, ինչպես նշված է մեր հոգևածում, Ասողիկի մոտ գրված է Ալեքսանդր Մակեդոնացու մահվանից 60 տարի հետո, ինչպես նաև Անտիոքոս Թեոսի 11-րդ ու Պտղոմեոս Ֆիլադելֆոսի 30-րդ տարիներին²⁶։ Ըստ գերիշխող կարծիքի, որին համամիտ է նաև Դ. Սարգսյանը, Ասողիկի այս երեք հավասարադր տեղեկությունները նշում են 250 կամ 251 թ. (մ. թ. ա.), եթե Պտղոմեոս Ֆիլադելֆոսի 1 (30)-րդի փոխարեն, հետևելով Ստ. Մալխասյանի առաջարկին և ինչպես Եվսեբիոս Կեսարացու մոտ է, հասկանանք 17 (34)-րդ տարի, իսկ 60 տարին էլ հաշվենք ոչ թե Ալեքսանդր Մակեդոնացու մահվանից (323 թ. մ. թ. ա.), այլ սելևկյան տոմարի սկզբնատարուց (312 կամ 311 թ. մ. թ. ա.)։ Պայմանականորեն ընդունենք նաև այս կարծիքը։

Այժմ փորձենք հաշվով թվագրել Պարթև արքաների հիշյալ 97-ամյա դամարը՝ հիմք ընդունելով Պտղոմեոս Նվերգետես Բ-ի 12-րդ տարին (134 թ. մ. թ. ա.), որն, ըստ Ասողիկի, Վաղարշակի թագավորության սկիզբն է։ Բ դեպ, այս տարեթիվը առավել անխախտ հենարան է, քանի որ դրա շուրջ, ինչպես նշվեց, տարակարծիքներ չեն կարող։ Այսպիսով, ըստ Ասողիկի կունենանք ոչ թե 250 կամ 251, այլ 231 թ. մ. թ. ա. (134 + 97), իբրև Արշակ Քաջի թագավորության սկիզբ, որը չի համընկնում նրա նշած տարիներից և ոչ մեկի հետ, եթե, իհարկե, այս կամ այն չափով հարադատ ենք մնում պատմական փաստերին։ Օրինակ, 231 թ. (մ. թ. ա.) հեռու է Ալեքսանդր Մակեդոնացու մահվանից ոչ թե 60, այլ 92 (323—231), իսկ սելևկյան տոմարի սկզբնատարուց 81 կամ 80 տարով (312/311—231)։ Բացի այս, այդ տարեթիվը համընկնում է ոչ թե Անտիոքոս Թեոսի 11-րդ տարվան, այլ նրա հաջորդ Սելևկոս Կալինիկոսի 14 կամ 13-րդին, ոչ թե Պտղոմեոս Ֆիլադելֆոսի 30 կամ 34-ին, այլ սրա հաջորդ Պտղոմեոս Նվերգետես Ա-ի 15-ին²⁷։

Արդ, ինչո՞ւ բացատրել այս ամենը։ Արդյո՞ք Ասողիկը չի իմացել իր հիշատակած գործիչների ստույգ տարեթվերը²⁸։

Ամենևին, այստեղ մեղքը Ասողիկինը չէ։ Այս բոլորի պատճառը հապշտապ ասված այն կարծիքներն ու ենթադրություններն են, որոնք, իբրև թե, Ասողիկին «ճիշտ հասկանալու» ուղիներ են նշում։ Որպեսզի համոզվենք այս բանում, այժմ էլ հրաժարվենք այդ ենթադրությունից և Ասողիկին հասկանանք այնպես, ինչպես գրել է։ Այս մոտեցումով նրա նշած համապատասխան դահատարիների դամարը, ինչպես վերևում տեսանք, հավասար է 128-ի։ 128-ամյա ժամանակաշրջանի սկիզբը (դարձյալ հաշվով 134 թվականից) 262 կամ 263 թ. է (մ. թ. ա.), որը, իրոք, 61-րդ տարին է Ալեքսանդր Մակեդոնացու մահվան։

Այսպիսով, երբ հրաժարվում ենք Ասողիկին ներկայացվող անհարկի պահանջներից, պարզվում է, որ նրա տեղեկությունները ոչ միայն չեն հակասում, այլև փոխնիփոխ լրացնում են միմյանց և կատարյալ փոխհամաձայնության մեջ են։ Ահա այս փոխհամաձայնությունն է այն անհերքելի ասպարեզը, որը հիման վրա կարելի է եզրակացնել հետևյալը.

²⁶ Տե՛ս «Պատմա-բանասիրական հանդես», 1966, № 1, էջ 163—164։

²⁷ Այս հաշվումների համար նախընտրել ենք Եվսեբիոս Կեսարացու «Ժամանակագրության» տվյալները։

²⁸ Ստույգ ասելով նկատի ունենք նրան քաջածանոթ Եվսեբիոս Կեսարացու տարեթվերը։

Առաջին. Ասողիկի մոտ, իրոք, Արշակ Քաջին տրված է 57-ամյա թագավորություն, իսկ նրա որդի Արտաշեսին՝ 31: Ուրեմն Արշակ Քաջի 57-ամյա թագավորությունը նրա ու Արտաշեսի գահատարիների գումարը չէ, և ոչ էլ Արտաշեսը վտարված է պարթևական արքայացանկից:

Երկրորդ. Վերստին հաստատվում է, որ երբ Ասողիկը նշում է, թե Պարթևները անկախացան Ալ. Մակեդոնացու մահվանից 60 տարի հետո, այսպես էլ պետք է հասկանալ, այսինքն 60 տարին հաշվել 323 կամ 322 թվականից (մ. թ. ա.):

Յերրորդ. Քանի որ Ասողիկը 60 տարին հաշվել է 323 կամ 322-ից, իսկ Սելևկյանների գահատարիների գումարն էլ նրա մոտ ճիշտ 60 տարի է մինչև Անտիոքոս Թևոսի 11-րդ տարին (Սելևկոս Նիկատոր՝ 31 + Անտիոքոս Սոտեր՝ 19 + Անտիոքոս Թևոսի 10-ը տարին), ուրեմն կասկածել չի կարելի, որ նա Սելևկյանների ժամանակագրությունը, հակառակ Գ. Սարգսյանի պահանջի, սկսել է Ալ. Մակեդոնացու մահվանից:

Չորրորդ. Հիմնավորվում է մեր այն ենթադրությունը, որով Ասողիկի նշած Պտղոմեոս Ֆիլադելֆոսի Լ (30)-րդ տարվա փոխարեն պետք է հասկանալ Ի (20)-րդ տարին, որովհետև վերջինիս 20-րդ տարին 264, 263 կամ 262 թվականն է (մ. թ. ա.) և համընկնում է նրա մյուս տվյալների հետ՝ ի դեպ, «Է» և «Ի» տառերի միմյանցով փոփոխվելու դեպքերը ձևագրերում քիչ չեն:

Այսպիսով, երբ որևէ կերպ չի հիմնավորվում «գահատարիների գումարի» մասին կարծիքը, և, ավելին, ամենատարբեր ուղիներով ապացուցվում է հակառակը, Արշակ Քաջի և Արտաշեսի գահատարիների փոփոխված լինելու փաստըն արդեն ակնբախ և անկասկածելի է դառնում, անգամ անկախ այն բանից, թե ո՞ւմ մոտ է պահպանվել այդ գահատարիների սկզբնագիրը՝ խորհնացո՞ւ, թե՞ Ասողիկի: Սրանով իսկ Դ. Սարգսյանի պնդումը, որով, իբր, ոչ նմանաձև տառերի զանգվածային փոփոխության հնարավորությունը գրեթե հավասար է գերոյի (էջ 132), իսպառ կորցնում է իր ուժը: Հենց այն բանը, որ Արշակ Քաջի և Արտաշեսի գահատարիները խորհնացու և Ասողիկի մոտ հանդիպում են ոչ նմանաձև տառերի զանգվածային փոփոխման օրինակով, անհերքելի ապացույց է ընդդեմ այդ ենթադրության: Նույնատիպ օրինակներ հանդիպում են նաև մատենագրական շատ ու շատ գործերում, և զարմանալի է անգամ, որ դրանք չի նկատել Գ. Սարգսյանը: Այսպես, Սամվել Անեցու որոշ ձեռագրերում Մաթուսաղայի կյանքի տեղում թյունը՝ Ղամեթին ունենալուց հետո մինչև ջրհեղեղ, ըստ «այլ օրինակաց», 228 տարի է, հանդիպում է նաև ԶԿԼ՝ տարի. կամ՝ հրեաների Եգիպտոսից ելնելուց մինչև Տիբերիոսի կայսրության 15-րդը անցել էր ՌՇԽ տարի, հանդիպում է նաև ՍԽԴ. կամ՝ Ապուլյաքը, Օթման և Ամր կառավարել են «ամս ԺԿ», հանդիպում է նաև ԼԸ²⁹: Գրիգոր Կամսախեցու որոշ ձեռագրերում՝ «Թվին ՊՂ այրեցին ըզխտրշայն...», հանդիպում է նաև «Թվին ԶԱ...»: Դավիթ Բաղիշեցու մոտ Վարդանանց նահատակների թիվը՝ ՌՄԼ հոգի, հանդիպում է նաև ՌԼԶ. կամ՝ Գագիկ Ա-ի թագավորելը՝ «Թվին ՆԽԲ», հանդիպում է նաև ՆՄԱ³⁰ և այլն:

Բերված օրինակները, որոնց թիվը կարելի է տասնապատկել ու հարյուրապատկել, անհերքելի ապացույցներ են հօգուտ այն բանի, որ կարող են մի-

²⁹ Տե՛ս Ս. Անեցի, Հաւաքմունք ի գրոց պատմագրաց, Վաղարշապատ, 1893, էջ 6, 53, 83:

³⁰ Տե՛ս «Մանր ժամանակագրություններ», հատ. 2, Երևան, 1956, էջ 265, 328, 338:

մյանցով փոփոխվել նաև ոչ նմանաձև տառերը՝ անգամ զանգվածաբար, որ ալոպիսի փոփոխությունները հազվադեպ չեն և, հետևաբար, Գ. Սարգսյանի պնդումը այդ առթիվ հիմնավոր չէ:

Հենվելով այս և հատկապես շարադրանքում բերված նախորդ տվյալների վրա, համոզված կարելի է հղրակացնել, որ Խորենացու մեզ հասած ձեռագրերում, ինչպես նաև նրան ընդօրինակող շատ մատենագիրների մոտ Պարթև առաջին երկու արձանների գահատառիները սկզբնագիր չեն, որ դրանք ինչ-ինչ ուղիներով ենթարկվել են հետագա փոփոխությունների և դրանց սկզբնագիրը պահպանվել է Ասողիկի ու Անանունի մոտ³¹:

• • •

Մեր երրորդ առաջարկով, ինչպես նշվել է, Պարթև չորրորդ գահակալ Արշականին պետք է տալ Մ (50)-ամյա թագավորություն (ընդունելով, որ սա է Խորենացու սկզբնագիրը, ինչպես ժամանակին առաջարկել են Սեն-Մարտենն ու Թ. Ալդալբեգյանը), Խորենացու և իր հետնորդների մոտ հանդիպող է (30) տարվա փոխարեն: Այս առաջարկի հիմքում ընկած է Խորենացու այն տեղեկությունը, որով Տիգրան Բ-ը թագավորել է հիշյալ արքայի 49-րդ տարվանից (Բ, 14) և, հետևաբար, նա (Արշականը) 49 տարուց պակաս չի թագավորել:

Անընդունելի համարելով այս առաջարկը, Գ. Սարգսյանը, միաժամանակ, սլաշտպանում է Ք. Պատկանյանի ու Ն. Ադոնցի տեսակետը, այն է՝ Արշականի է (30) տարին համարել սկզբնագիր ու անփոփոխ, իսկ Տիգրան Բ-ի թագավորությունը հաշվել Պարթև հինգերորդ գահակալ Արշանակի 19-րդ տարվանից:

Սույն առաջարկը առերևույթ հավանական է երևում, երբ հարցը քննում ենք Խորենացու ժամանակագրության միայն մի հատվածի՝ Տիգրան Բ-ի Արշեղ ժամանակահատվածի շրջանակներում, ինչպես վարվել է Գ. Սարգսյանը, և ընդհակառակը, դառնում է խիստ անհավանական, երբ դիտում ենք այդ ժամանակագրության և առհասարակ Խորենացու «Հայոց պատմության» ընդհանրության մեջ:

Համոզվելու համար նախ հիշյալ երկու առաջարկների համեմատության միջոցով տեսնենք, թե ի՞նչ առավելություններ կամ ի՞նչ թերություններ ունի նրանցից յուրաքանչյուրը և որի՞ն պետք է տալ նախապատվությունը:

Սույն համեմատությունը կատարելիս այդ առաջարկները նշանակենք Ա (առաջին) և Բ (երկրորդ) տառերով, «Ա»-ով՝ մեր սլաշտպանածը, իսկ «Բ»-ով՝ Գ. Սարգսյանի սլաշտպանածը:

1. Երկու դեպքում էլ համաժամանակագրական տվյալները հավանական են երևում տվյալ հատվածի գահատառիներով: Այսպես, եթե Արշականին տալու լինենք 50 տարի (Ա-ի դեպքում), կունենանք հետևյալը՝ սրա 24-րդից Հայաստանում, ըստ Խորենացու, թագավորում է Տիգրան Բ-ի հայր Արտաշեսը՝ շարունակելով թագավորել 25 տարի (Բ, 11, 12), այս հաջորդում է Տիգրան Բ-ը նույն արքայի (Արշականի) 49-րդ տարվանից: Եթե Արշականի 30-ամյա թագավորությունը համարենք սկզբնագիր (Բ-ի դեպքում), Արտաշեսը իր 25-ամյա թագավորության սկզբի 7 տարիներին ժամանակակից է Արշականին,

³¹ Նկատի ունենալով Ասողիկին համարյա ժամանակակից Ուխտանեսի օրինակը, որի մոտ Խորենացու մեզ հասած գահատառիներն են՝ Արշակ Քաջ՝ 31, Արտաշես՝ 26, ենթադրում ենք, որ Խորենացու երկր՝ Ասողիկին ու Անանունին ծանոթ ձեռագիրը մեզ չի հասել:

մնացած 18 տարին նրա որդի և հաջորդ Արշանակին: Հետևաբար, անհավանական չէ, որ Տիգրանը թագավորած լինի վերջինիս 19-րդ տարվանից:

2. Եթե Ա-ի ղեկավարում պետք է փոփոխված համարել Արշականի գահատարիքը՝ 30-ի փոխարեն 50 (քիչ հետո պարզ կդառնա, թե ինչու 50 և ոչ ավելի), իսկ Տիգրան Բ-ին վերաբերող համաժամանակագրությունը անփոփոխ՝ Արշականի 49-րդից, Բ-ի ղեկավարում հակառակն է՝ փոփոխված համարել համաժամանակագրությունը՝ Արշականի 49-ի փոխարեն՝ Արշանակի 19-ը, գահատարիքը անփոփոխ՝ Արշական 30: Այստեղ մի փոքր առավելություն ունի Բ առաջարկը, քանի որ գահատարիքը որևէ տարբերություն չունի (որը ամենևին հիմք չէ դրա անփոփոխ լինելուն), իսկ համաժամանակագրությունը ունի տարբերություններ: Օրինակ, հորենացու և նրա առանձին հետևորդների մոտ Տիգրան Բ-ի թագավորության սկզբնատարվա առթիվ հանդիպում է՝ Արշականի 29-րդից, 19-րդից, 10-րդից, 27-րդից, անդամ Արշանակի 49-րդից, սակայն ոչ մի տեղ չի հանդիպում Գ. Սարգսյանի ցանկացածը՝ Արշանակի 19-րդից, չնայած հնարավոր է, որ այսպես էլ լինելու է ղեկ, հիշյալ բոլոր տարբերությունները բացահայտ սխալ են և չէին կարող լինել հորենացու մոտ: Այսպես, Տիգրանը չէր կարող ըստ հորենացու թագավորել Արշականի 29-րդից, 19-րդից, 10-րդից կամ 27-րդից, քանի որ, դարձյալ ըստ հորենացու, նույն արքայի 24-ից թագավորել է Արտաշեսը 25 տարի, նոր ապա Տիգրանը: Չէր կարող թագավորել նաև Արշանակի 49-ից, որովհետև վերջինս հորենացու մոտ ընդամենը 32 (վերիսկսված՝ 31) տարի է թագավորել:

3. Ա-ի ղեկավարում, ինչպես իրավացիորեն նկատել է Գ. Սարգսյանը, Պարթև 6-րդ գահակալ Արշելը կարող է թագավորել միայն Տիգրան Բ-ի մահվանից մեկ տարի հետո, հետևաբար, նրանք համաժամանակյա թագավորներ լինել չեն կարող, իսկ հորենացու մոտ, ընդհակառակը, Տիգրանը իր մահվանից 2 կամ 3 տարի առաջ դաշինք է կնքել Արշելի հետ և նրանից օգնական զորք է ստացել (Բ, 19): Բ-ի ղեկավարում այս անհամաձայնությունը չկա, որը և առավելություն է Ա-ի համեմատությամբ:

4. Տիգրան Բ-ի որդի և անմիջական հաջորդ Արտավազդը հորենացու մոտ (Բ, 22, 23) ոչ թե օրերի կամ ամիսների, այլ, ինչպես ճիշտ նկատել են ն. Ադոնցն ու Գ. Սարգսյանը, տարիների թագավորություն է ունեցել³², որից հետո է թագավորել Արշամը (Բ, 24): Հակառակ սրան, Բ-ի ղեկավարում Տիգրանին անմիջապես հաջորդելու է Արշամը, իսկ Արտավազդը իրեն հատկացված գործերով դուրս է մղվում արքայացանկից, քանի որ նրան թագավորելու ժամանակ չի մնում: Ահա այս անհամաձայնությունից էլ վերծ է Ա առաջարկը, որը առավելություն է Բ-ի համեմատությամբ:

5. Բ առաջարկի պաշտպաններ ն. Ադոնցն ու Գ. Սարգսյանը հորենացու երկի երկրորդ գրքի 22 և 23 գլուխների պահանջներից հարկադրված, որոնց համաձայն, ինչպես նշվեց վերևում, Արտավազդը սոսկ օրեր կամ ամիսներ չէ, որ իշխել է, ենթադրաբար նրան հատկացնում են 2-ամյա թագավորություն: Եվ քանի որ սրանով ստեղծվում է ժամանակագրական անհամաձայնություն հայ ու պարսից թագավորների շարքերում, ինչպես նաև հորենացու ամբողջ ժա-

³² Н. А. Д о н н, Начальная история Армении..., «Византийский временник», 1901 вып. 1—2, էջ 83, ծանոթ. 5: Գ. Սարգսյան, Մ. հորենացու «Հայոց պատմություն» ժամանակագրական համակարգը, էջ 24:

մանակագրական համակարգում, նրանք երկու տարով էլ ավելացնում են Պարթև 6-րդ դահակալ Արշելի թագավորությունը՝ 20-ի փոխարեն տալով 22 տարի։ Սրանով էլ, սակայն, չի ստեղծվում կատարյալ համաձայնություն։ Արշելի 20-ամյա դահատարիքի նշումից զատ, հորենացին հայտնում է նաև, որ սա (Արշելը) իր թագավորության 20-րդին, որը միաժամանակ նրա կյանքի վերջին տարին էր, թագադրել է Արտավազդի հորեղբայր և հաջորդ Արշամին (Բ, 24)։ Ն. Ադոնցն ու Գ. Սարգսյանը սրբադրելի են համարում նաև հորենացու այս տեղեկությունը՝ ենթադրելով, որ Արշամի թագադրումը տեղի է ունեցել ոչ թե Արշելի 20-րդ, այլ 22-րդ տարում։ Ա առաջարկի դեպքում, երբ Արշականին 50-ի փոխարեն տալիս ենք 50 տարի և սրա 49-րդից հաշվում Տիգրանի թագավորությունը,՝ պարզվում է, որ վերջինիս մահվանից մինչև Արշամ, երբ ապրելու գործել է Արտավազդը, 20-ամյա մի ժամանակաշրջան ինչ-ինչ պատճառներով չի նշված հորենացու մոտ, որը պետք է վերականգնել³³։

Այսպիսով, երբ զուգակշռում ենք տվյալ խնդրին վերաբերող այս երկու առաջարկները, պարզ է դառնում, որ հորենացու ժամանակագրական համակարգի միայն մի հատվածի շրջանակներում դրանք համարյա հավասարազոր են և զժվար է առավելությունը տալ մեկին կամ մյուսին։ Սակայն փոխվում է պատկերը, երբ այդ առաջարկները դիտում ենք հորենացու ժամանակագրական համակարգի և առհասարակ նրա «Հայոց պատմության» ընդհանրության մեջ։ Այստեղ արդեն բացահայտ առավելությունը Ա առաջարկի կողմն է, որով և հավանական է դառնում նրա ընդունումը։

Այսպես, Բ առաջարկի դեպքում, ինչպես ցույց է տվել փորձը (նկատի ունենք Ք. Պատկանյանի և Գ. Սարգսյանի վերականգնած ժամանակագրությունները), հռոմեական գործիչներն ու կայսրերը հորենացու մոտ հանդես են գալիս իրենց իրական պատմական ժամանակներից ավելի վաղ։ Ստացվում է այնպես, որ հորենացին շուրջ 500-ամյա ժամանակաշրջանի (մ. թ. ա. I դարի կեսից մինչև մ. թ. V դարի կեսը) հռոմեական կայսրերից և ոչ մեկի ստույգ ժամանակագրությունը չի իմացել։ Օրինակ, Ք. Պատկանյանի կազմած աղյուսակի համաձայն, որին հետևել է նաև Ստ. Մալխասյանը, հորենացու շեղումը հռոմեական կայսրերի ստույգ ժամանակագրության համեմատությամբ հասնում է 18—20 տարվա³⁴ (ըստ Ստ. Մալխասյանի՝ 18—24), իսկ Գ. Սարգսյանի աղյուսակով՝ 30—40 տարվա³⁵։ Քսան տարվա շեղում էլ մեզ մոտ կլինի, եթե փորձենք Ա-ի փոխարեն Բ առաջարկը ներառնել նաև մեր կազմած ժամանակագրական աղյուսակում³⁶։

³³ Սույն պահին այնքան էլ էական չէ, թե այդ 20-ամյակից բանի՞ տարին հատկացնել Արտավազդին՝ ամբողջը, ինչպես ենթադրել է Բ. Ավդալբեդյանը, թե՞ սկզբի 7 կամ 10 տարին, որը, մեր կարծիքով, առավել հավանական է։

³⁴ Տե՛ս К. Патканов, Материалы для армянского словаря, вып. II, Петербург 1884, էջ 49—64 (հմտ. Մ. հորենացու «Հայոց պատմության» Ստ. Մալխասյանի թարգմանության հավելվածը, Երևան, 1940, 1961, 1968)։

³⁵ Գ. Սարգսյանը լուկ խոսքով համամիտ է, որ հորենացին իմացել է հռոմեական կայսրերի ստույգ ժամանակագրությունը, սակայն, ինչպես ցույց ենք տվել մեր մի հոդվածում, իր կազմած աղյուսակով՝ հակառակ արդյունքի է հասել (տե՛ս «Պատմա-բանասիրական հանգես», 1967, № 4, էջ 141—153)։

³⁶ Մեզ համար այսպիսի մի աշխատանք կատարել է Դ. Սարգսյանը՝ մեր դեմ գրած քննադատական հոդվածում (էջ 127—129) և չի կոհհել, որ դրանով ցուցադրվում է հենց իր պաշտպանած առաջարկի անհավանականությունը։ Ի դեպ, Գ. Սարգսյանը դրանով հետապնդել է որոշակի

Այս արտառոց երևույթը, որը, ցավոք, առանց քննադատական վերաբերմունքի առ այսօր ընդունվում է, մեծագույն և անհերքելի ապացույցն է Բ առաջարկի անհավանականության, քանի որ հորենացին բաշատեղյակ է Հոռմի պատմությանը և, պարզապես, անհնար է նրան վերագրել հոռմեական կայսրերի ժամանակագրությանը անգլիական մատենագրի դեր, հորենացին իմացել է հոռմեական կայսրերի ժամանակագրությունը իրեն ծանոթ սկզբնաղբյուրների նման, իսկ այդ աղբյուրների տեղեկությունները, ինչպես հայտնի է, համարյա չեն տարբերվում մեր իմացածից: Ուրեմն, հորենացու ժամանակագրական համակարգում հոռմեական կայսրերը պետք է հանդիսանան իրենց իրական, պատմական ժամանակներում, որը, փաստորեն, նրա երկից բխող պարտադիր պահանջ է:

Ահա թե ինչու մեզ համար նախընտրելին ոչ թե Բ. Սարգսյանի պաշտպանած առաջարկն է (Արշական՝ 30, Տիգրան Բ՝ Արշականի 19-ից), որով հոռմեական բոլոր կայսրերը տեղահանվում են իրենց ապրած ժամանակներից, այլ սյուսը՝ Արշական՝ 50, Տիգրան Բ՝ Արշականի 49-րդ տարվանից, քանի որ այս դեպքում, ինչպես երևում է մեր կազմած աղյուսակից³⁷, այդպիսի անհավանական վիճակ չի ստեղծվում: Այսինքն, հոռմեական կայսրերը (աննշան բացառություններով) հանդիս են պալիս իրենց ճիշտ ժամանակներում, որը պահանջվում էր հորենացու երկրի շարադրանքից: Այս է պատճառը նաև, որ չի կարելի Արշականին 50-ից ավելի գահատարի հատկացնել, ասենք՝ 60, 70 և այլն, քանի որ այս դեպքում էլ հոռմեական կայսրերը հանդիս կգան 10, 20 և այլն տարով ուշ, նայած թե որքան է ավելացված Արշականի գահատարիքը:

Այսպիսով, Արշականին 30-ի փոխարեն 50-ամյա քաղաքագրություն հատկացնելը ամենեին էլ այս կամ այն ուսումնասիրողի կամքի գործը չէ, ինչպես կարծում է Գ. Սարգսյանը, այլ սովորական մի վրիպակի ուղղում է, հորենացու հաջորդավոր տեղեկությունների պահանջներից ելնելով:

Ընդունելով Արշականի 50 տարին, անխուսափելի է դառնում նաև հայոց թագավորների շարքում 20-ամյա պակաս ժամանակի լրացումը, որը ինչ-ինչ պատճառներով բացակայում է (սա, իհարկե, հորենացու մոտ եղակի դեպք չէ) և, ինչպես ցույց ենք տվել³⁸, զետեղվելու է Տիգրան Բ-ի մահվանից մինչև Արշամ ժամանակահատվածում: Այս լրացումը, որը կատարվում է հորենացու համապատասխան տեղեկությունների ցուցումով, անխուսափելի է. նախ հայ ու պարսից շարքերի համամասնությունը պահպանելու համար և ապա, որ հոռ-

նպատակ: Եթե հիշում է ընթերցողը, Բ. Սարգսյանի կազմած ժամանակագրությունը առարկելի ենք համարել հատկապես այն բանով, որ դրա համաձայն հորենացու նշած յուրաքանչյուր դեպք, իրադարձություն թվագրվում է երեք տարբեր թվականներով: Այս առարկությունը մեղմելու նպատակով, Գ. Սարգսյանը նման, ինչպես ինքը կասեր՝ «անիծյալ» վիճակ ստեղծել է նաև մեզ համար: Կողք-կողքի գնելով իր ստեղծած ու մեղ վերադրած ժամանակագրության և ապա մեր կազմած աղյուսակի համապատասխան տարեթվերը (էջ 128), նա փորձել է պատրանք ստեղծել, թե տեսնք, Շահինյանի մոտ էլ հորենացու ժամանակագրությունը «երկրի ելկվում է», որ, իբր, հորենացու նշած միևնույն իրադարձությունը թվագրվում է 2 տարբեր թվականներով: Իրականում Շահինյանի մոտ այդպիսի բան չկա և, հետևաբար, Գ. Սարգսյանի դատողություններն այդ առթիվ ավելորդ են: Ամեն ինչ պատասխանատու է իր կատարածի համար, իսկ ուրիշի կատարածի համար՝ երբեք: Ինչի նման կլինեք, երբ մենք էլ, ինչպես վարվել է Գ. Սարգսյանը, մեր առաջարկներից մեկն ու մեկը խցկինք իր կազմած աղյուսակում և իր համար տարեթվեր հորինենք...

³⁷ Տե՛ս Ի՞նչ ենք տեղում, էջ 43:

³⁸ Տե՛ս նույն տեղում, էջ 43:

րենացու ժամանակագրության մեջ, որ շարքի համեմատությամբ էլ վերցնելու լինենք, հռոմեական գործիչները ժամանակագրորեն մնան իրենց տեղերում։ Ի վերջո, որ Տիգրան Բ-ի որդի Արտավազդը ունենա թագավորելու ժամանակ, արովհետև ըստ Խորհնացու նա տարիների թագավորություն է ունեցել։

Արդ, եթե վերը քննարկված երկու առաջարկներից նախընտրելին մեր պաշտպանածն է՝ Արշական՝ 50 տարի, Տիգրան Բ՝ Արշականի 49-րդից, ինչպես վարվել Տիգրան—Արշակ ժամանակահատվածի անհամաձայնության հետ, որը դրսևորվում է միայն այս դեպքում և Դ. Ծարգսյանի միակ հիմնավոր առարկությունն է՝ ընդդեմ մեր վերականգնած ժամանակագրության։

Ինչպես պարզվում է Խորհնացու համապատասխան տեղեկությունների ուսումնասիրություններից, այդ «անհամաձայնություն» կոչվածը իրականում այդպիսին չէ՝ բառիս բուն իմաստով։ Այսպես, Պարթևների մոտ (և ոչ միայն Պարթևների) ընդունված կարգ է եղել, որ արքայորդիները, հատկապես գահաժառանգները, դեռևս հոր կենդանության ժամանակ թագավոր են նշանակվել իրենց տերության տարբեր մասերում՝ կուսակալություններում։ Այսպիսի փաստեր հանդիպում են ոչ միայն օտար աղբյուրներում և հանրահայտ են, այլև ավանդել է Խորհնացին։ Օրինակ, ըստ Խորհնացու Արտաշես I-ը, երբ Պարթևներից խլեց «արքայից արքայությունը», «Արշական ընդ իւրով ձեռամբ կացուցանէր թագաւոր Պարսից, որպէս զՏիգրան որդի իւր՝ հայոց» (Բ, 11)։ Կամ, դարձյալ ըստ Խորհնացու, Պարթև VIII գահակալ Արտաշեսի որդին՝ Ներսէսը, հոր կենդանության ժամանակ, այն էլ մանուկ հասակում, եղել է «աւրայ Ասորեստանի ի Բաբելոն» (Բ, 33)։ Արդ, տվյալ խնդրի համար ուշագրավը Խորհնացու այս վերջին տեղեկությունն է։ Նախ որպես ասպցույց, որ թագավոր հոր կեդանության ժամանակ որդին կարող էր թագավոր նշանակվել պարթևական տերությունում, երկրորդ՝ Ասորեստանը, ըստ Խորհնացու, պարթևական տերության այն կուսակալություններից է եղել, ուր թագավորել են արքայորդիները, և երրորդ, որ ամենակարևորն է, հիշյալ Ներսէսի հայր Արտաշեսը՝ Խորհնացու նշած ժառանգական հաջորդականությամբ, Տիգրան II-ի հետ դաշինք կնքած Արշակ արքայի թոռն է (Բ, 68)։ Ըստ որում, Խորհնացու համապատասխան գահատարիներով Արշակ արքայի թագավորության սկզբից մինչև Արտաշեսի թագավորությունը ընկած է ընդամենը 66-ամյա ժամանակաշրջան (Արշակ՝ 20 ÷ Արշավիր՝ 46 և ասյա՝ Արտաշես) և, ինչպես տեսանք, արտահայտում է պապի ու թոռան ժամանակային հեռավորություն։ Ուրեմն Խորհնացու խոսքը պարթևական տերության միևնույն ժամանակաշրջանին յուրահատուկ կարգի մասին է, և անհավանական չի լինի, եթե այս կարգը տեսնենք նաև Արշակի ժամանակ։ Ավելին, երբ նկատի ենք առնում Արշակին յուրահատուկ որոշ հանգամանքներ ևս, ոչ միայն հավանական է դառնում նրա թագավորությունը իր հոր՝ Արշանակի ժամանակ, այլև ենթադրվում է, որ Տիգրան II-ի հետ դաշինք կնքելիս նրա ձեռքին կլինեիր պարթևական տերության գործնական ղեկավարությունը։ Այսպես՝ ա) ըստ Խորհնացու, Արշանակին հաջորդել է Արշակը (Բ, 68), ուրեմն նա պարթևական տերության գահաժառանգ է եղել։ բ) Խորհնացու՝ մեր վերականգնած ժամանակագրությամբ Տիգրան II—Արշակ դաշինքը կնքվել է 44 կամ 43 թ. (մ. թ. ա.), այսինքն Տիգրանի մահվանից (41 թ.) 2 կամ 3 տարի շուտ, իսկ Արշանակի մահվանից (44 թ.)՝ 3—4 տարի։ Պարզ ասած, Արշանակի կյանքի ամենավերջին տարիներին. գ) Սա մի ժամանակաշրջան էր, ինչպես հայտնի է և ինչպես երևում է

Խորենացու մոտ (Բ, 14—24), երբ պարթևական տերության արևմտյան սահմանները անընդհատ վտանգվում էին աշխարհատենչ Հռոմի կողմից, երբ զբր-վում էր անգամ այդ տերության լինել-չլինելու հարցը, և Պարթևների ուշադրու-թյան կենտրոնում իրենց արևմտյան սահմանների պահպանության ու դրանով իսկ հռոմեական վտանգը կանխելու դործն էր:

Այս փաստերը, որոնց հեղինակը նույնպես Խորենացին է, թվում է, բա-վարար հիմքեր են մտածելու, որ իր հոր՝ Արշանակի թագավորության վերջե-րին, թերևս քաղաքական ասպարեզում սրա տնդործունյա լինելու պատճառով, պարթևական տերության դործերը (փաստորեն իր տերության) տնօրինել է թագաժառանգ Արշեղը: Մինչև հոր մահը, հավանական է, Արշեղը եղել է այդ տերության տվյալ ժամանակի ամենակարևոր կուսակալության՝ Ասորեստանի թագավոր և իր բուն գահակալությունից, այսինքն՝ հոր մահվանից 3 կամ 4 տարի առաջ Տիգրան II-ի հետ դաշինք է կնքել և նրան օգնական զորք է տրա-մադրել՝ ընդդեմ հռոմեացիների: Ուրեմն, նշված անհամաձայնությունը, որին Գ. Սարգսյանը այնքան ծանրակշիռ գեր է հատկացրել, հենց իր՝ Խորենացու համապատասխան տեղեկություններով կորցնում է այդ դերը և, մեր կարծի-քով, չի կարող հիմք ծառայել հավանական տեսակետից հրաժարվելու համար: Այսինքն, չի կարող հիմք ծառայել, որ Մ (50)-ամյա թագավորության փոխա-րեն Արշականի համար ընդունենք վրիպակային Լ (30) տարին և դրանով կաս-կածի տակ դնենք Խորենացու գիտելիքները՝ Հռոմի պատմության ու հռոմեա-կան կայսրերի ժամանակագրության վերաբերյալ:

Վկայակոչված փաստերից զատ, մեր պաշտպանած առաջարկների հավա-նականությունը հաստատող ապացույց է նաև այն, որ դրանցով կազմված ժա-մանակագրությունը ծայրի ի ծայր, իր բոլոր մանրամասնություններով համա-հնչյուն է Խորենացու աշխատության երկրորդ և երրորդ դրքերի ամբողջ շարա-դրանքին: Ի դեպ, ճիշտ չի վարվել Գ. Սարգսյանը, երբ մեր կազմած ժամանա-կագրության ու Խորենացու շարադրանքի հարյուրավոր համաձայնությունները անտեսելով հենվել է սոսկ Տիգրան Բ—Արշեղ, ինչպես տեսանք, քվացող ան-համաձայնության վրա և փորձել է հակառակ տպավորություն ստեղծել:

Դ. Սարգսյանի հոգևածում կան նաև առարկելի այլ հարցեր՝ մտքեր, դա-տողություններ (ինչպես, օրինակ, նրա կարծիքը սելևկյան ժամանակագրու-թյան մասին՝ որպես ժամանակի պատմական իրականության մայրուղի, Խորենացու աշխատության մեջ ժամանակագրական մի քանի համակար-գերի գոյությունը օրինականացնելու միտումը, Խորենացու ժամանակագրու-թյան մինչև մ. թ. 1 թ. ընկած ժամանակահատվածում ուսումնասիրողի աղա-տության մասին, նրա և մեր կազմած ժամանակագրություններում իբրև թե նկատվող նույնությունը՝ Քրիստոսից հետո ընկած հատվածներում և այլն), որոնք, սակայն, սոսկ տպավորություն ստեղծող հայտարարություններ են, և այս հոգևածում չարժև դրանց վերլուծությամբ զբաղվել: Իհարկե, ոչ այն պատճառով, որ դրանք ուշադրության արժանի հարցեր չեն: Ամենևին. սյար-զապես այն պատճառով, որ Խորենացու ժամանակագրության ճիշտ կամ սխալ վերականգնումը պայմանավորված է ոչ թե դրանցով, այլ շարադրանքի ըն-թացքում քննարկված հարցերով, որոնք ավելի քան արժանի են լուրջ ուշա-դրության:

О НЕКОТОРЫХ ВОПРОСАХ ХРОНОЛОГИИ У МОВСЕСА ХОРЕНАЦИ

Л. П. ШАГИНИЯН

(Резюме)

В статье подвергаются критике положения Г. Х. Саркисяна, касающиеся хронологической системы «Истории» Хоренаци. На основе анализа фактов автор показывает, что: 1) исходной точкой хронологии Хоренаци служит не начальный год селевкидской эры (312/311 гг. до н. э.), а год смерти Александра Македонского (323 г. до н. э.); 2) подлинные данные Хоренаци о годах царствования первых двух парфянских правителей сохранились не в рукописях самого Хоренаци, а у автора X—XI вв. Асогика; 3) для четвертого парфянского правителя Аршакана вместо указанного у Хоренаци тридцатилетнего периода царствования следует признать—исходя из анализа многочисленных данных текста Хоренаци—пятидесятилетний период; 4) в списках армянских Аршакидов отрезок времени после смерти Тиграна II и до царствования Аршама, когда правил сын Тиграна Артавазд, соответствует, по-видимому, двадцати годам, хотя время это почему-то не указывается в дошедших до нас рукописях Хоренаци.